

PETRI RAMI
VEROMANDUI,
Regij professoris,
DIALECTICÆ
LIBRI DUO.




Edinburgi Excudebant Hære-
des Andreæ Hart. 1637.

Presented 20 May 1950
AP.S. 1.82.63(1-2)

SCOTTISH LIBRARY





PETRI RAMI DIA-
LECTICÆ, LIBER PRI-
mus: de inventione.

CAP. I.

Quid Dialectica?

Dialectica est ars bene differendi,
eodemque sensu logica dicta est.

CAP. II.

De partibus dialecticæ, deque
argumenti generibus.

Dialecticæ partes duæ sunt, inventio
& iudicium.

Inventio est pars dialecticæ de inve-
niendis argumentis.

Argumentum est, quod ad aliquid
arguendum affectum est:

Quales sunt singulæ rationes, solæ & per
se consideratæ.

Argumentum est artificiale aut in-
artificiale.

Artificiale, quod ex sese arguit.

Est autem primum, vel a primo or-
um.

Primum, quod est sue originis.

Estque simplex aut comparatum.

Simplex, quod simpliciter & absolute consideratur.

Estque consentaneum, aut dissentaneum.

Consentaneum est, quod consentit cum re, quam arguit.

Estque consentaneum absolute aut modo quodam.

Absolute ut causa & effectum.

CAP. III. De efficiente, procreante & conservante.

Causa est, cuius vi res est.

Itaque primus hic locus inventionis fore est omnis scientiæ: sciri que demum creditur, cuius causa reneatur: ut merito dicatur Poeta:

Felix, qui potuit rerum cognoscere causas.

Causa est efficiens & materia, forma & finis.

Efficiens est causa, à qua res est.

Cuius etsi vera genera nulla nobis appareant, ubertas tamen permagna multis quibusdam distinguitur.

Primo quod procreet aut tueatur.
Ovidius 4. de Remed.

DIALECT. LIB. I. 5

Ergo ubi visus eris nostra medicabilis arte,
Fac monitis fugias ocia prima meis:
Hæc ut ames, faciunt: hæc quæ fecere, tuentur;
Hæc sunt jucundi causa cibique mali.
Ocia si tollas, periere Cupidinis arcus,
Contemptæque iacent & sine luce faces.

Sic pater & mater procreant, nutritur
tur, 4. *Æneid.*

Non tibi diva parēs generis, nec Dardanus auctor
Perfide: sed *Curis* genuit te cantibus horrens
Caucasus, Hyrcanæq; admorunt ubera tigres.

Sic Romulus conditor Romanæ urbis, re-
ges deinde reliqui, consules, imperatores, tu-
tores & conservatores fuere.

CAP. IIII. De efficiente sola & cum aliis.

*Secundo, causa efficiens sola efficit
aut cum aliis.*

*Earumque omnium sæpe alia princi-
palis, alia adiuvans & ministra.*

Æneid. 9. Nisus advocat ab Euryalo in se-
factæ cædis & culpam & poenam; quia solus
auctor fuerit:

Me me; adsum qui feci: in me convertite ferrum
O Rutuli! mea fraus omnis: nihil iste nec ausus,
Nec potuit. —

Solitaria causa cum plerisque & principali-
bus & sociis pro Marcello variè adhibetur. nam
bellicas laudes (ait Orator) solèt quidam ex-
tenuare verbis, easque detrahere ducibus, &
com-

communicare cum multis, ne propria sint
 imperatorum: & certe in armis militum vir-
 tus, locorum opportunitas, sociorum auxilia,
 ciasses, commeatus multum iuvant: maxi-
 mam vero partem quasi suo iure fortuna sibi
 vendicat: & quicquid est prospere gestum, id
 pene omne ducit suum. At vero huius glorie
 Caesar, quam es paulo ante adeptus, socium
 habes neminem: totum hoc, quantumcunque
 est (quod certe maximum est) totum (in-
 quam) est tuum. Nihil tibi ex ista laude cen-
 turio, nihil præfectus, nihil cohors, nihil tur-
 ma decerpit: quin etiam illa ipsa rerum hu-
 manarum domina fortuna, in istius se socie-
 tatem gloriæ non offert, tibi cedit, tuam esse
 totam ac propriam fatetur.

*Instrumenta etiam in causis adiuvant
 tibus connumerantur.*

Quo argumento impius Epicureus dispu-
 tat mundum nunquam esse factum, i. de Nat.
 Quibus enim (ait) oculis animi intueri por-
 tit, vester Plato fabricam illam tanti operis,
 qua construi à Deo atque ædificari mundum
 facit? Quæ molitio? quæ ferramenta? qui ve-
 stes? quæ machinæ? qui ministri tanti operis
 fuerunt?

C A P. V. De efficiente
 per se & per accidens.

*Tertio, causa efficiens per se effici-
 aut per accidens.*

DIALECT. LIB. I. 7

Per se, quæ sua facultate efficit: ut quæ natura vel consilio faciunt.

Ventorum naturalis efficientia est 1. Æneid.

Incubnere mari, totumque a sedibus imis
Vna Eurusque Notusq; ruunt, creberq; procellis
Africus, & vastos tollunt ad littora fluctus.

Consilii exemplum est illa Ciceronis de se confessio. Suscepto bello, Cæsar, gesto etiam magna ex parte, nullavi coactus, iudicio meo ac voluntate, ad ea arma profectus sum, quæ erant sumpta contra te.

Per accidens efficit causa, quæ externa facultate efficit: ut in his, quæ sunt necessitate vel fortunâ.

Necessitate, quum efficiens vi cogitur ad effectum.

Qualis est Pompejanorum excusatio. At mihi quidem (ait Orator) si proprium & verum nomen nostrum ali quæretur, fatalis quædam calamitas incidisse videtur & improvidas hominum mentes occupavisse: ut nemo mirari debeat humana consilia divina necessitate esse superata.

Fortuna est causa per accidens, quando præter efficientis scopum aliquid accidit.

Sic casu fortuito (ait Tullius 3. de nat. deor.) Pheræo Iasoni profuit hostis, qui gladio vomerem eius aperuit, quam medici sanare non poterant.

*In hoc genere causarum imprudentia
connumerari solet.*

Ovid. 2. Trist.

Cur aliquid vidi? cur noxia lumina feci?

Cur imprudenti cognita culpa mihi est?
Inscius Actæon vidit sine veste Dianam;

Præda suis canibus nec minus ille fuit.

Scilicet in superis etiam fortuna luenda est.

Nec veniam, læso numine, casus habet.

Hinc sumitur deprecatio: qualis est pro Li-
gario: ignosce, pater: erravit: lapsus est: non
putavit: si unquam posthac. Et paulo post
erarvi: temere feci: pænitet, ad clementiam
tuam confugio, delicti veniam peto: ut igno-
scas oro.

Fortunæ autem nomen ignoratio causa-
rum confinxit. Quum enim aliquid præter
consilium spemque contigerit, fortuna vulgo
dicitur. Nec inscitæ Iuvenalis.

Nullum numen abest, si sit prudentia: sed te
Nos facimus, fortuna, deam, cœloque locamus.

C A P. VI. De materia.

Materia est causa, ex qua res est.

Hoc argumento ficto, apud Ovid. 2. Me-
tam. Solis, domus auro pyropo, ebore, argen-
to componitur:

Regia Solis erat sublimibus alta columnis,
Clara micante auro, flammæsq; imitante pyropo:
Cujus ebur nitidum fastigia summa tegebat:
Argenti bifores radiabant lumine valvæ.

Cæsar 1. bell. civil. Imperat militibus Cæ-
sar, ut naves faciant, cuius generis cum su-
peri-

DIALECT. LIB. I. 9

rioribus annis usus Britannię docuerat: carinae primum ac statumina ex levi materia fiebant: reliquum corpus navium viminibus contextum coriis integebatur.

C A P. VII. De forma.

Causæ primum genus cuiusmodi est in efficiente & materia: secundum sequitur in forma & fine.

Forma est causa, per quam res est id quod est.

*Ideoq; hinc a ceteris rebus distinguitur
Et forma simul cum re ipsa ingeneratur*

Anima rationalis est forma hominis: quia per eam homo est homo, & distinguitur a ceteris omnibus naturis: geometricarum figurarum in triangulis, quadrangulis sua forma est: physicarum, cœli, terræ, arborum, piscium sua forma est.

*Unde præcipua rerum ut natura est,
sic erit explicatio, si possit inveniri:*

Ut in artificiosis rebus facilius occurreret, Cæsar 7. Muri autem omnes Gallici hac reformasunt: trabes directæ perpetuæ in longitudinem, paribus intervallis distantes inter se binos pedes, in solo collocantur: hæ revinciuntur introrsus & multo aggere vestiuntur ea autem, quæ diximus, intervalla grandibus in fronte saxis effarciuntur. His collocatis & coagmentatis alius insuper ordo adjicitur

ut idem illud intervallum serveretur, neque inter se contingant trabes, sed paribus intermissis spatiis singulae singulis saxis interiectis arcte contineantur: sic deinceps omne opus contexitur, dum iuxta muri alitudo expleatur. Hoc cum in speciem varietatemque opus deformae non est, alternis trabibus ac saxis, quae rectis lineis suos ordines servant: tum ad utilitatem, & defensionem urbium summam habet opportunitatem: quod & ab incendiis lapidibus, & ab ariete materia defendit: quae perpetuis trabibus pedes quadragenos plerumque introitus revincta neque perumpi, neque distrahi potest,

Sic forma Virgiliani portus explicatur
Aeneid. 3.

Est in secessu longo locus: insula portum
Efficit obiectu laterum, quibus omnis ab alto
Frangitur, inque sinus scindit sese unda reductus:
Hinc atque hinc vastae rupes geminique minantur
In caelum scopuli, quorum sub vertice late
Aequora tuta silent: tum silvis scena coruscis
Desuper, horrentique atrum nemus imminet umbra.
Fronte sub adversa scopulis pendentibus antrum
Intus aquae dulces, vivoque sedilia saxo,
Nympharum domus: hic fessas non vincula naves
Vlla tenent: unco non alligat ancora morsus.

CAP. VIII. De fine.

Finis est causa, cuius gratia res est:

Physicis rebus finis homo propositus est: homini Deus. Omnium artium est aliquod summum bonum & finis extremus: ut grammaticae, bene loqui; Rhetoricae, bene dicere; logicae

DIALECT. LIB. I. II

Logicæ, bene differere. Iuno 1. Æneid con-
nubii finem assumit, quum Æolo Deiopeiam
pollicetur, solatii scilicet prolisque gratia.
Sunt mihi bis septē præstanti corpore Nymphæ,
Quarum (quæ forma pulcherrima) Deiopeiam
Connubio jungam stabili propriamque dicabo,
Omnes ut tecum meritis pro talibus annos
Exigat, & pulchra faciat te prole parentem.

In defensione Ligarii Cicero Tuberonem
accusatorem urget, quum armorum contra
Cæsarem susceptorum finem premit. Et cer-
te (ait) contra ipsum Cæsarem est congressus
armatus. Quid enim, Tubero, tuus ille distri-
ctus in acie Pharsalica gladius agebat? cuius
latus ille mucro petebat? quis sensus erat ar-
morum tuorum? quæ tua mens? oculi? manus?
ardor animi? quid cupiebas? quid optabas?

CAP. IX. De effectu is.

Effectum est, quod è causis existit.

Sive igitur gignatur, sive corrumpatur, sive modo quolibet moveatur quidlibet, hic motus & res motu facta effectum dicitur.

Huius loci sunt laudes & vituperationes, quarum pleni sunt libri sacri & profani.

Æneid. 6. facta variorum populorum comparantur ad nominis Romani laudem:

Excudent alii spirantia mollius æra, *causa puri*
Credo e quidē, ducent vivos de marmore vultus.

Ore

Orabunt causas melius, cœlique meatus
 Describent radio, & surgentia sidera dicent.
 Tu regere imperio populos, Romane, memento
 Hæ tibi erunt artes: pacique imponere morem,
 Parcere subiectis, & debellare superbos.

Huc dicta scriptaq; referenda sunt.

Pericles & Hortensius bene dicendi laude
 celebrantur: eodemque argumento Demo-
 sthenes & Cicero etiam bene scribendi.

*Adhunc locum referuntur consilia &
 deliberationes, etiamsi omnino ad exte-
 rum perductæ non fuerint.*

Parmenio & Philotas morte multati sunt,
 quia coniurationis in Alexandrum essent su-
 specti: ut Curtius & Arrianus meminérunt.
 De Lentulo & Cethego aliisque Catilinæ
 popularibus, Romani senatus iudicio suppli-
 cium sumtum est.

*Sunt etiam effecta virtutum & vitio-
 rum.*

Horatius hoc modo ebrietatis effecta de-
 scribit:

Quid non ebrietas designat? operta recludit,
 Spes iubet esse ratas; in prælia trudit inermem:
 Sollicitis animis onus eximit, ac docet artes.
 Fœcundi calices quem non fecere disertum?
 Contracta quem non in paupertate solutum?

CAP. X. De subiecto.

*Argumentum modo quodam consenta-
 neum succedit, ut subiectum & adiunctum*

Sub-

DIALECT. LIB. I. 13

Subiectum est, cui aliquid adiungitur.

Anima est subiectum scientiæ, ignorantia, virtutis, vitii, quia hæc præter essentiam accedunt: corpus, sanitatis, morbi, roboris, infirmitatis, pulchritudinis, deformitatis.

Homo subiectum est divitiarum, paupertatis, honoris, infamiæ, vestitus, comitatus.

Locus est subiectum rei locatæ. Sic philosophi divinis entibus, licet parte & magnitudine carentibus, attribuunt locum. Sic geometræ locum locique differentias in rebus geometricis: sic physici multo etiam diligentius in rebus physicis considerant, in mundo, in elementis simplicibus, in rebus compositis. Sic Virgilius in Georgicis suum quemque propositis rebus locum deligendum admonet, ut segetibus, arboribus, vitibus, pascuis.

At prius ignotum ferro quam scindimus æquor,
Ventos & varium cœli prædiscere morem
Cura sit, ac patrios cultusq; habitusq; locorum.
Et quid quæq; ferat regio, & quid quæq; recuset
Hic segetes, illic veniunt felicius uvæ:
Arborei sætus alibi, atque in iussa virescunt
Gramina.

Sensilia sensuum, & res virtutibus ac vitiis proposita, subiecta vitiorum & virtutum hoc modo nominantur.

Color est subiectum visus; sonus subiectum auditus; quia hi sensus in his sensilibus occupantur & exercentur. Virtutes & vitia declarantur in ethicis hoc argumento: temperantia & intemperantia voluptate; magnanimitas

tas & ignavia periculo: liberalitas & avaritia divitiis. Sic res numerabilis arithmetica, mensurabilis (ut ita dicam) Geometrica subiicitur. Eiusmodi subiecto Cicero 2. Agrar. disputat, inter Campanos nullam contentionem esse, quia nullus sit honor. Non gloriae cupiditate (ait) efferebantur, propterea quod ubi honos publice non est, ibi cupiditas gloriae esse non potest: non contentione nec ambitione discordes. Nihil enim supererat, de quo certarent: nihil quod contra peterent: nihil ubi dissiderent. Eodem argumento a Propertio dictum est:

Navita de ventis, de tauris narrat arator,
Enumerat miles vulnera, pastor oves.

CAP. XI. De adiuncto.

Adiunctum est, cui aliquid subiicitur.

Quod argumentum etsi subiecto est levius attamen est copiosius & frequentius. Itaque, quod de eius modi signis ait Ovid. 2. de Remedio,

Forfitan hæc aliquis (nā sunt quoq;) parva vocabit
Sed quæ non prosunt singula multa juvant.

Animi corporisque & totius hominis bona & mala, quæ dicuntur, adiuncta sunt animi, corporis, hominis.

Denique quicquid ulli subiecto extrinsecus accidit adiunctum eius est.

Ut autem locus est in subiectis, sic *tempus* est in adiunctis; *duratio* nempe *rerum præterita, præsens & futura*: omninoque *qualitates* sub-

DIALECT. LIB. I. 15

subjectis præter causas adiunctæ, sive propria
sint, quæ omni soli q; subiecto semper conveniunt
ut homini risus, & quo hinnitus, cani latratus:
sive communes, quæcunq; non sunt eo modo pro-
pria.

Hoc genere argumenti Fannium Chæream
Cicero pro Roscio Comædo cavillatur: Non-
ne ipsum caput & supercilia illa penitus abra-
sa olere malitiam, & clamitare calliditatem
videatur? Nonne ab imis unguibus usque ad
verticem summum (si quam conjecturam af-
fert homini tacita corporis figura) ex fraude,
fallaciis, mendaciis constare totus videtur?
qui idcirco capite & superciliis semper est ra-
sis, ne pilum ullum viri boni habere dicatur.
Sic Martialis 2. Lib. Zoilum ludit:

Crine ruber, niger ore, brevis pede, lumen luscus
Rem magnam præstas, Zoile, si bonus es.

Sic vestitus & comitatus res adiunctæ sunt
quo circumstantiæ genere Dido venatum pro-
ficiscens, magnificè 4. AENEID. depingitur.
Oceanum interea surgens aurora reliquit,
It portis, iubare exorto, delecta iuventus:
Retia rara, plagæ, lato venabula ferro,
Massylique ruunt equites & odora canum vis:
Reginam thalamo cunctantem ad limina primi
Pœnorum exspectant: ostroque insignis & auro
Stat sonipes, ac frena ferox spumantia mandit.
Tandem progreditur, magna stipante caterva,
Sidoniam picto chlamydem circumdata limbo,
Cui pharetra ex humero, crines nodantur in au-
Aurea purpuream subnectit fibula vestem. (rum

*Est vero adiunctorum ab subiecta,
quibus*

quibus occupantur, usus item magnus

Hoc argumento Plato miseras civitates auguratur, quæ medicorum & iudicum multitudinem indigeant; quia multam quoque & intemperantiam & iniustitiam in ea civitate versari necesse sit.

Sed consentaneorum categoria sic est, unde quidvis alteri consentaneum, vel idem vel unum dici possit: omnesque modi unitatis & (ut ita dicam) identitatis huc sunt tanquam ad primos & simplices fontes referendi

CAP. XII. De diversis.

Argumentum primum consentaneum expositum est.

Dissentaneum lequitur, quod a re dissentit.

Sunt autem dissentanea inter se æque manifesta: alterumque ab altero æqualiter arguitur: tametsi sua dissensione clarius elucescant.

Dissentanea sunt diversa vel opposita.

Diversa sunt dissentanea, quæ sola ratione dissentiunt.

Quo de genere sunt illa frequentissima, non hoc, sed illud, quanquam, tamen.

Pro Pompeio: Non victoriam, sed insignia victoriæ reportarunt. Ovid. 2. de Arte:

Non formosus erat, sed erat facundus Vlysses.

AEnd.

DIALECT. LIB. I. 17

Æneid. 2.

Hic Priamus, quanquam in media iam morte tenetur,
Non tamen abstinuit. (netur,

Paulo secus in Eumucho,

Nam si ego digna hac contumelia
Sum maximè: at tu indignus, qui faceres tamen
Item illa alius modi, Pro Lig. Scelus tu illud
Iud vocas, Tubero? cur? isto enim nomine illa
adhuc causa caruit. Alii enim errorem appellant,
alii timorem: qui durius, spem, cupiditatem,
odium, pertinaciam: qui gravissime,
temeritatem; scelus, præter te adhuc nemo.

CAP. XIII. De disparatis.

*Opposita sunt dissidentanea, quæ ratione
& re dissentiunt.*

*Itaq: eidem attribui, secundum idem,
& ad idem, & eodem tempore non possunt*

Sic Socrates albus & ater non potest eadem
parte esse: pater & filius eiusdem: sanus &
æger eodem tempore: at albus esse potest alia
parte, & ater alia: pater huius, filius illius:
sanus hodie, cras æger.

*Itaque ex altero affirmato alterum
negatur.*

*Opposita sunt disparata, aut contraria.
Disparata sunt opposita, quorum unum
multis pariter opponitur:*

Ut viride, cineraceum, rubrum, media sunt
inter album & nigrum, quæ singula extremis
&

& inter se disparata sunt. Sic liberalitas & avaritia inter se disparantur. Sic homo, arbor, lapis, & eiusmodi res infinitæ disparantur. nec eadem res potest esse homo, arbor, lapis, Virgil. 1. AENEID. hoc argumento disputat. O quā te memorē, virgo! namq: haud tibi vultus Mortalis: nec vox huius minem sonat: O dea certe.

CAP. XIII. De relatis.

Contraria sunt opposita, quorum unum uni tantum opponitur.

Suntque affirmantia, aut negantia.

Affirmantia, quorum utrumque affirmat, ut relata & adversa.

Relata sunt contraria affirmantia, quorum alterum constat ē mutua alterius affectione.

Atque inde nominata sunt relata: ut pater qui filium habet, & filius qui patrem habet.

Et ob hanc mutuam relationis causam, relata dicuntur simul esse natura: ut qui alterum perfecte norit, norit & reliquū.

Pro Mar. Ex quo profecto intelligis, quanta in dato beneficio sit laus, quum in accepto tanta sit gloria. Martialis in Sossibianum lib. 1. Tum servum scis te genitum, blandeque fateris, Quum dicis dominum, Sossibiane, patrem.

Sic apud Quintilianum lib. 5. cap. 10. Si portorium Rhodiis locare honestum est, & Hermacreonti conducere. Quomodo & in Oratore

DIALECT: LIB: I. 19

Oratore perfecto Tullius: Num igitur est periculum (ait) ne quis putet in magna arte & gloriosa turpe esse docere alios id, quod ipsi fuerit honestum discere? Studium vero quoddam suum Cicero è relatis illis in oratore prodidit. Iam illa (inquit) matura, uxor generi, noverca filii, filia pellex. Quod idem in ferrea ætatis descriptione Ovidius apertius affectavit. I. Metam.

— Non hospes ab hospite tutus,
Non focer a genero: fratrum quoque gratia rara est
Imminet exitio vir coniugis, illa mariti:
Lurida terribiles miscent aconita novercæ:
Filius ante diem patrios inquirat in annos.

Atqui argumentum talis relationis contrarium nihil habet, imo arguit mutuas causas, ut sum tuus pater, tu es igitur meus filius. At quum dico, sum tuus pater, non igitur sum tuus filius, tum contraria vere sunt.

C A P. X V. De adversis.

Adversa sunt contraria affirmantia, quæ inter se velut è regione perpetuo adversantur.

Æneid. II.

Nulla salus bello, pacem te poscimus omnes.
Sic albor & nigror, calidum & frigidum,
virtus & vitium opponuntur. Parad. I. contra Epicureos. Illud tamen arcte tenent, accurateque defendunt; voluptatem esse summum bonum: quæ quidem mihi vox pecudum videtur

detur, non hominum. Tu, quum tibi sive Deus, sive mater (ut ita dicam) rerum omnium natura dederit animum, quo nihil est præstantius, neque divinius, sic te ipse abiicies ac prosternes, ut nihil inter te atque inter quadrupedem interesse putes? Pecudem & hominem adversa Cicero opposuit: voluptas pecudis bonum est, non igitur hominis. Sic libertas & servitus apud Tibullum. 2. lib.

Sic mihi servitium video dominamque paratam,
Tu mihi libertas illa paterna vale.

Pro Marc. Nunquam enim temeritas cum sapientia commiscetur, nec ad consilium casus admittitur.

C A P. X V I.

De contradicentibus.

Contraria negantia sunt, quorum alterum ait, alterum negat idem.

Eaque sunt contradicentia, aut privantia.

Contradicentia sunt contraria negantia, quorum alterum negat ubique.

Ut iustus, non iustus: animal, non animal: est, non est, sunt contradicentia. Sic in defensione Murænae contradicuntur sententiis Caronis & Ciceronis, illius Stoici, huius Academici. Dialogus est his verbis: Nihil ignoveris imo aliquid, non omnia. Nihil gratiæ causa feceris: imo ne resistito gratiæ, quum officium

DIALECT: LIB: I: 21

& fides postulabit. Misericordia commo-
tus ne sis, etiam in dissolvenda severitate:
sed tamen est aliqua laus humanitatis. In sen-
tentia permaneto: enim vero nisi sententia
alia vicerit melior. Martial. lib. 1.

Bella es, novimus: & puella, verum est,
Et dives, quis enim potest negare?
Sed dum te nimium, Fabulla, laudas,
Nec dives, neque bella, nec puella es.

Cicero in Tusc. cogit hoc argumento At-
ticum Epicureum fateri mortuos miseros
non esse, si omnino nulli sint, ut Epicurei cre-
debant. Iam malletm (ait) Cerberum metue-
res, quam ista tam inconsiderate diceres. At-
ticus. Quid tandem? Marcus, Quem esse ne-
gas, eundem esse dicis: ubi est acumen tuum?
quum enim miserum esse dicis, tum eum qui
non sit, esse dicis. Tum post longam disputa-
tionem Atticus ait: Age, iam concedo non esse
miseros, qui mortui sunt: quoniam extorsisti,
ut faterer, qui omnino non essent, eos ne mi-
seros quidem esse. Sic Terentianus Phædria
Dori Eunuchi dictum elevat, quod affirmasset
prius, quæ post infitiaretur.

Modo ait, modo negat.

CAP. XVII. De privantibus

*Privantia sunt contraria negantia, quo-
rum alterum negat in eo tantum subiecto
in quo affirmatum suapte natura inest.*

Atque hic affirmatum dicitur habitus,

negatio

negatum autem privatio.

Sic motus & quies. Sic ebrius & sobrius. Martialis libro. 3.

Ebrius es: nec enim faceres hæc sobrius unquam.

Sic cæcum esse & videre. Pro Cælio, exhi-
stat igitur ex hac familia aliquis, ac potissi-
mum cæcus ille, minimum enim dolorem ca-
piet, qui istam non videbit. Sic pauper & di-
ves opponuntur apud Martial lib. 5.

Semper eris pauper, si pauper es, AEmiliane,
Dantur opes nullis nunc nisi divitibus.

Talia sunt mors & vita in Miloniana: Hu-
ius mortis sedetis ultores, cuius vitam, si pu-
tetis per vos restitui posse, nolitis. Item ta-
cere & loqui i. Cat. Quid expectas. auctori-
tatem loquentium, quorum voluntatem rati-
torum perspicis? pro Marc. Doleo quum res-
publica in mortalis esse debeat, eam in unius
mortalis anima consistere.

Sed dissentaneorum categoria sic est, unde
quidvis ab altero differre quolibet modo
possit.

CAP. XVIII. De paribus

. Argumenta simplicia ita fuerunt in con-
sentaneis & dissentaneis.

*Comparata sunt, quæ inter se com-
parantur.*

*Quæ tamen si ipsa comparisonis natu-
ra æque nota sunt: attamen alterum alte-
ro alicui notius & illustrius esse potest.*

Sæpe

DIALECT: LIB. I: 23

Saepeque notis brevius indicantur, aliquando partibus plenius distinguuntur, quae propositio redditioque nominantur.

Atque omnino comparata etiam ficta, arguunt fidemque faciunt.

Comparatio est in quantitate vel qualitate.

Quantitas, quae res comparata quantae dicuntur.

Est quae parium vel imparium.

Paria sunt, quorum est una quantitas.

Argumentum igitur paris est, quum par explicatur a pari,

Eiusque notae sunt par, aequale, aquare: idem quod, tam quam, tanto, quanto, tot quot, & non magis, non minus. Virgil. AEnceid. 2.

Par levibus ventis.

AEnceid. 3.

Et nunc aequali tecum pubesceret aëvo.

AEnceid. 6.

*En huius, nate, auspiciis illa inclyta Roma
Imperium terris; animos aequabit olympo.*

Propositio deinde redditioque distinguuntur.

*Catil. 4. Cuius res gestae atque virtutes
iisdem, quibus solis cursus, regionibus ac terminis continentur. AEnceid. 4*

Tam ficti praeque tenax, quam nuntia veri.

Catull.

Tanto

Tanto pessimus omnium poeta,
Quanto tu optimus omnium patronus.

Ovid. 4. Trist.

Littora quot conchas, quot amœna rosaria florum
Quotque soporiferum grana papaver habent
Silva feras quot alit, quot piscibus unda natant
Quot tenerum pennis aëra pulsat avis.

Tot premor adversis: quæ si comprehendere
Icariæ numerum dicere coner aquæ.

Philip. 9. Neque enim ille magis iuris con-
sultus, quam iustitiæ fuit. Itaque quæ pro-
ciſcebantur a legibus & a iure civili, semper
ad facilitatem equitatemque referebat: nec
constituere litium actiones malebat, quæ
controversias tollere. Ovid. 2. de arte;

Non minor est virtus, quam quærere, paria tu

Pro Mur- Paria cognosco esse ista in L. Ma-
rena, atque ita paria, ut neque ipse dignitas
vinci potuerit, neque te dignitate superari.
2. Philip. Quorum facinus commune, cur ne-
corum præda communis? Ter. in Adel.
Quando ego non curo tui, ne cura meum.

*Huius vero loci sunt consuetudinem illi
è contrariis quidem orta, sed parum
collatione tractata.*

Ut Marcialis illud,
Tum servum scis te genitum, blandeq; facere
Quum dicis dominum, Sotibiane; patrem.
Ovid. 1. Fast.

In precio precium nunc est, dat census honores
Census amicitias: pauper ubique jacet.

Ex adversis sunt frequentiora.

Cicer

DIALECT: LIB: I. 25

Cicero pro Sylla: neq; vero quid mihi irascere, intelligere possum: si, quod eum defendo quem tu acculas, cur tibi quoq; ipse non succentleo, qui accuses eum quem ego defendo? Inimicum, inquis, accuso meum: & amicū (inquam) ego defendo meum. Sic 3. Tusc. Quod quum fateantur satis magnam vim esse in vitis ad miseram vitam, nonne fatendum esse eādem vim in virtute esse ad beatam vitā? Contraria enim contrariorum sunt consequentia.

Sic interdū laceffiti par pari reponimus.

Qualis est Ecl. 3 apud Virgilium contentio pastorum: Damoetæ, primo hoc ænigma proponentis

Dic quibus in terris (& eris mihi magnus Apollo) Tres pateat cœli spatium non amplius ulnas?

Et Menalcæ, alterum ænigma reponentis.

Dic quibus in terris inscripti nomina Regum Nascantur flores, & Phyllida solus habeto.

Paria vero ficta sunt illa apud AEschinem Socraticum, quibus demonstrat Socrates, cum Xenophontis uxore, & cum Xenophonte ipso Aspasiā loquutam. Dic mihi, quæso, Xenophontis uxor, si vicina tua melius habeat aurū quam tu habes, utrum illius an tuum malis? Illius, inquit. Et si vestem, & cæterum ornamentum muliebri precii majoris habeat, quam tu habes, tuamne an illius malis? Illius vero respondit. At vero, si virum illa meliorem habeat, quam tu habes, an illius malis? Hic mulier erubuit. Aspasia autem cum ipso Xeno-

B,

phonte

phonte sermonem instituit: quæso, inquit, si vicinus tuus meliorem equum habeat, quam tuus est, tuumne equum malis an illius? Illius, inquit. Quod si meliorem fundum habet, quam tu habes, utrum tandem illius malis? Illius, inquit, meliorem scilicet. Quod si meliorem meliorem habeat, quam tu habes, utrum illius malis? Atque hic Xenophon quoque ipse tacuit.

C A P. XIX. De maioribus.

Imparia sunt, quorum quantitas non est una.

Impar est maius aut minus.

Maius est, cuius quantitas excedit.

Propria nota sunt huius rationis; non solum, sed etiam: malo hoc, quam illud: plus quam item per comparationem Grammaticam.

Cicero pro Murena:

Tollitur è medio non solum ista verbosa simulatio prudentiæ, sed etiam illa domina rerum sapientia: ut geritur res. Spernitur orator non solum odiosus in dicendo, aut loquax, verum etiam bonus, horridus miles amatur.

Hinc sumitur logica quedam gradatio climacis rhetorice interdum coniuncta. Pro Milone neque vero se populo solum, sed etiam senatui tradidit: neque senatui modo, sed etiam publicis præsidiis & armis: neque his tantum, verum etiam ejus potestati, cui senatus totam rempub. omnem Italiæ pubem, cuncta populi

Romani

DIALECT. LIB. I. 27

Romani arma commiserat. Iuvenalis Satyra
8. adversus gloriosum nobilem:

Malo pater tibi sit Thersites, dummodo tu sis
Alacidae similis, Vulcaniaque arma capeffas,
Quam te Thersitæ similem producat Achilles.

Pro Marc. Plus admirationis habitura,
quam gloriæ. AEneid. 1.

O socii (neque enim ignari sumus ante malorū)
O passi graviora! dabit Deus his quoque finem.

Cic. pro Mur. Noli tam esse injustus, ut:
quum tui fontes vel inimicis tuis pateant, no-
stros rivulos etiam amicis putes clausos esse
oportere.

Hinc illa *gradatio est sine climace Rhetorica*
apud Terent.

Thr. Magnas vero agere gratias Thais mi-
hi? Gn. Ingentes Thr. Ain tu? Læta est: Gn.
Non tam ipso quidem dono, quam abs te da-
tum esse: id vero serio triumphat.

Ficta vero maiora etiam plurimum valent.
Terent. Heaut. Satrapes si fiet
Amator, nunquam sufferre eius sumtus queat
Nedum tu possis. AEneid. 5.

Magnanime AEnea, non si mihi Iupiter auctor
Spondeat, hoc sperem Italiam contingere cœlo:
Mutati transversa fremunt, & vespere ab atro
Consurgunt venti, atque in nubem cogitur aer:
Nec nos obniti contra, nec tendere tantum
Sufficimus.

CAP. XX. De minoribus.

Minus est, cuius quantitas exceditur.

Minus autem saepe indicatur propriis non ut, non solum, sed ne: potius hoc, quam illud cum, tum. Item per Grammaticam comparationem, denique per negationem parium.

Cicero 2. Catil. Nemo non modo Roma sed ne ullo in angulo totius Italiae oppressus a re alieno fuit, quem non ad hoc incredibile sceleris sedus assciverit. 1. Catil. Ut exul potius tentare, quam consul vexare rem publicam possis. 1. Agr. Quae cum omnibus est difficilis & mala ratio, tum vero mihi praeter ceteros. Ovid. 3. Trist.

Sævior es tristi Busride, sævior illo,
Qui falsum lento torruit igne bovem.

Ovid. 1. Remed.

Vt corpus redimas, ferrum patieris & ignes.

Arida nec sitiens ora levabis aqua:

Vt valeas animo quicquam tolerare negabis?

At precium pars hæc corpore maius habet.

Atque huius eiusdem speciei sunt hæc formulae, quæ fiunt negatione parium. Philip. Omnes ex omni ætate, qui in hac civitate intelligentiam iuris habuerunt, si unum in locum conferantur, cum Servio Sulpicio non sunt conferendi. Cat. 2. Quanquam illi qui Catilinam Massiliam ire disticant, non tam hæc queruntur, quam verentur. Pro Muræna; Quod enim fretum, quem Euripum tot motus, tantas, tam varias habere putatis agitationes fluctuum: quantas perturbationes & quantos æstus habet ratio comitiorum?

Aliquando nota nulla est.

DIALECT. LIB. I. 29

Pro Marcel. Tantum abes a perfectione maximorum operum, ut fundamenta, quæ cogitas, nondum jeceris. Pro Archia. Saxa & solitudines vocis respondent: bestiaæ sæpe immanes cantu flectuntur atque consistunt: nos instituti rebus optimis non poetarum voce moveamur?

Ver. 7. Gradatio illa est a minoribus. Facinus est vincire civem Romanum; scelus verberare prope paritidum necare; quid dicam in crucem tollere?

Finguntur etiam minora. Virg! Ecl. I.

Ante leves ergo pascuntur in æthere cervi,

Et freta desituent nudos in litore pisces;

Ante pererratis amboiurum finibus exul

Aur Ararim Parthus bibet, aut Germania Tigrim

Quam nostro illius labatur pectore vulcus.

Philip. 2. Orem non modo visu sedam,

sed etiam auditu. Si inter coenanti in tuis im-

manibus illis poculis hoc tibi accidisset, quis

non turpe duceret? In cœtu vero populi Rom

negocium publicum gerens, magister equitum

cuius stare turpe esset, is vomens, frustis escu-

lentis vinum redolentibus gremium suum

& totum tribunal implevit.

CAP. XXI.

De similibus.

Adhuc comparatio in quantitate fuit, sequitur.

Comparatio in qualitate, qua res compara-

*parata quales dicuntur: nempe
aut dissimiles.*

*Similia sunt, quorum est eadem
litas.*

Similitudo proportio dicitur, ut
proportionalia.

Notæ similitudinis (quæ uno verbo
cluditur) sunt, *similis, effigies, more, in
tanquam, sicuti*: tum negatio dissimilitudinis
haud secus, non aliter

Æneid.

Os humerosque Dædalis similis.

Philip. 9. Quanquam nullum monumentum
clarius Servius Sulpitius relinquere
rult, quam effigiem morum suorum, virtutis
constantiae, pietatis, ingenii, filium.

Namque ea vel nemo, vel solus Achilleo
tollere mori potest.

In Pis. Unus ille dies mihi quidem
immortalitatis fuit, quoniam patriam redi. Ven.
I. Sed repente è vestigio ex homine, tanquam
aliquo poculo Circeus, factus est Verrès. P.
Pompeio: Itaque omnes quidem nunc in his
locis Cn: Pompeium, sicut aliquem, non ex
hac vrbe missum, sed de coelo delapsum intu-
entur. Æneid. 3. Haud secus ac iussi faciunt.
Terentius in Phor. Ego isti nihilo sum aliter
ac fui.

*Similitudinis partes deinceps explican-
tur, & quidem disrunctè vel continuè.*

Similitudo

*Similitudo disiuncta est quando termini
quatuor re ipsa distinguuntur.*

Eclog. 5.

Tale tuum carmen nobis, divine poeta,
Quale sopor fessis in gramine.

Carmen ad auditorem, ut sopor ad fessum,
termini quatuor distincti sunt. Ad Frat. 1.
Quemadmodum gubernatores optimi vim
tempestatis, sic sapientissimi viri fortunæ im-
petum per sæpe superare non possunt. Hic
quatuor sunt item termini, ut gubernator ad
tempestatem, sic sapiens ad fortunam. 1. Trist.

Scilicet ut fulvum spectatur in ignibus aurum.
Tempore sic duro est inspicienda fides.

Cicero 2. Phil. Sed nimirum ut quidam
morbo & sensus stupore, suavitatem cibi
sentiant: sic libidinosi, avari, facinorosi
laudis gustum non habent. Virgilius fecerat
hos versus:

Nocte pluit tota, redeunt spectacula mane,
Divisum imperium cum Iove Cæsar habet.
Batyllus arrogaverat sibi, præmiumque
magnum erat adeptus. His igitur similibus
Batyllum Virgilius lausit:

Hos ego versiculos feci, tulit alter honores.

Sic vos non vobis nidificatis aves:

Sic vos non vobis mellificatis apes:

Sic vos non vobis vellera fertis oves:

Sic vos non vobis fertis aratra boves.

Aliquando nulla proferuntur similitudo.

Virgilius Eclog. 2.

O formose puer, nimium ne crede color.

Alba

Alba ligustra cadunt; vaccinia nigra leguntur.

Continua similitudo est, quando est in primus terminus ad secundum, sic secundus ad tertium.

Leg. 3. viderisne magistratus hanc esse ut præsit, præscribat recta & utilia & conjuncta cum legibus? ut enim magistratibus leges, ita populo præfunt magistratus. Hic termini sunt tres, lex, magistratus, populus.

Ficta similitudo parem vim habet superioribus illis. sed præcipue in hac explicata similitudine Æsopici apologi excellunt.

Horat. i. Epist. i.

Quod si me populus Romanus forte roget, cur
Non ut porticibus, sic iudiciis fruamur istis.
Nec sequar atque fugiam, quæ diligit ipse vel odit
Olim quæd vulpes ægroto cauta leoni
Respondit, referam: quia me vestigia terrent
Omnia te adversum spectantia, nulla retrorsum.

C A P. XXII.

De dissimilibus.

Dissimilia sunt comparata, quorum quatuor est diversa.

Dissimilitudinis propriæ notæ sunt, dissimile, dispar, differens aliud, secus.

Pro Plan. Quanquam dissimilis est debiti pecuniæ & gratiæ: Ennius. O domus antiqua, heu quam dispari dominare domino?
Cæsar. i. bell. Gal. Hi omnes lingua, institutis legibus

DIALECT. LIB. I. 33

legibus inter se differunt. 2. Agrar. Alio vultu, alio vocis sono, alio incessu esse meditabatur. Cic. 2. Nat. Quoniam cepti secus agere: atque initio dixeram.

Disimilitudinis notæ etiam sunt *per negationem similitum*. 3. de Orat. Non est philosophia similis artium reliquarum. 2. AEneid.

At non ille, factum quo te mentiris, Achilles
Talis in hoste fuit Priamo. —

Horat. 1. Epist.

Non eadem est ætas, non mens. —

1. Ad Frat. Sit annulus tuis, non tanquam vas aliquod, sed tanquam ipse tu. 3. Philip. Certus dies non ut sacrificii, sic consilii expectari solet. Hoc argumento pastor ille errorem suum confitetur:

Urbem (quam dicunt Romam) Melibœe, putavi
Stultus ego huic nostræ similem. —

Et mox,

Sic canibus catulos similes, sic matribus hæde s
Noram, sic parvis componere magna solebam.

Ut nec canibus catuli, nec matribus hædi,
sic nec Mantua Romæ similis est.

Nota plerumque nulla est, & dissimilitudo plenius explicatur.

Quint. lib. 3. cap. 11. Brutus occidit liberos proditionem molientes, Manlius virtutem filii morte multavit. Catullus:

Soles occidere & redire possunt:

Nobis quum semel occidit brevis lux,

Nox est perpetua una dormienda.

CAP. XXIII. De conjugatis.

Haftenus prima argumenta sunt expofita,
fequuntur.

*Orta de primis, quæ perinde funt ad
id quod arguunt, ficut prima, unde ori-
untur: ut coniugata & notatio: distribu-
tio & definitio.*

*Coniugata funt nomina ab eodem prin-
cipio varie deducta:*

Ut iuftitia, iuftus, iufte.

*In coniugatis fymbolum eft confentien-
tiae argumentorum.*

Propertius Lib. 2.

*Libertas quoniam nulli iam reftat amanti,
Nullus liber erit, fi quis amare velit.*

Hic libertas caufa eft, cur fis liber.

*Cicero 3 de Nat. Deorum, quum de Diony-
fio tyranno loquitur. Iam menfas argenteas
de omnibus delubris iuffit auferri, in quibus
quod more veteris Græciæ infcriptum effet,
Donorum Deorum, uti eorum bonitate velle
fe dicebat. Dii boni funt; eorum igitur boni-
tate eft utendum. Hic ex effectis ad caufas
eft difputatum.*

*Terent. Homo fum, humani à me nihil a-
lienum puto. Ex fubiecto eft ad adiunctum.*

*Contra Phil. 2. Non tractabo ut con-
fulenti, ne ille quidem me ut confularẽm. In
Pifon. Quum effer omnis illa caufa confularis
& fenatoria, auxilio mihi opus fuerat & con-
fulis & lenatus.*

CAP.

DIALECT. LIB. I. 35

CAP. XXIII. De notatione.

Notatio est nominis interpretatio.

Nomina siquidem sunt nota rerum: nominumq; vel derivatorum, vel compositorum, si vera notatione fiant, ratio reddi potest ex aliquo argumento primo.

Ut homo ab humo.

Ovid. 9. Fast.

Stat vi terra sua, vi stādo vesta vocatur.

Ex causa est notatio.

At focus a flammis, & quod fevet omnia, dictus

Ex effectis est notatio.

Item 4. Ver. O Verrea præclara! Quo enim accessisti, quo non attuleris tecum istum diem etenim quam tu domum, quam urbem adisti, quod factum denique, quod non eversum atque exersum reliqueris Quare appellentur sane ista Verrea, quæ non ex nomine, sed ex moribus naturaque tua constituta esse videantur. Ex effectis est notatio.

Ovid. 1. Fast.

Prima dies tibi Carna, datur, dea cardinis hæc est

Numne clausa aperit, claudit aperta suo.

Hic est notatio è subiecto cardine circa quem numen deæ exercetur.

At ex adiunctis notatio est Bambalionis. Phil. quia balbus & stupidus. Hinc igitur cavillatio in Antonium generum. Tuæ coniugis bonæ foeminae, locupletis quidem certe, Bambalio quidam pater, homo nullo nuntio

ro, nihil illo contentius: qui propter
tantam linguæ stuporemque cordis, cogi-
men ex contumelia traxerit. Ex adjunctis
notatio.

E dissentaneis autem sunt illa apud Qui-
til. lib. 1. cap. 6 Lucus, quia umbra opacus, pa-
rum luceat: & ludus, quia sit longissime à lu-
fu: & dis, quia minime dives.

Potest etiam e comparatis esse notatio: ut
Pyropus, quod ignis flammam imitetur.

*Est vero ut notationi ad suum nomen,
sic nomini ad notationem sua affectio.*

Ut animi plenus, ergo animosus: & contra
animosus, ergo animi plenus.

CAP. XXV. De distributione.

Reliquum est ex ortis aliunde argumentis
argumentum distributionis & definitionis.

*In qua utraque affectio reciprocationis
est, illic parium omnium cum toto, hic
definitionis cum definito.*

*Distributio est, quum totum in partes
distribuitur.*

Totum est, quod continet partes.

Pars est, quæ continetur à toto.

*Atque ut distinctio totius in partes,
distributio: sic collectio partium ad con-
stituendum totum inductio dicitur.*

Distrib

DIALECT. LIB. I. 37

Distributio sumitur ex argumentis totius quidem consentaneis, inter se autem dissentaneis.

Itaque tanto accuratior erit, quanto partium & cum toto consensio, & inter se dissensio maior fuerit.

CAP. XXVI.

De distributione ex causis.

Distributio prima est ex absolute consentaneis, causis nempe & effectis.

Distributio ex causis est, quando partes sunt causa totius.

Hic distributio integri in sua membra precipue laudatur.

Integrum est totum, cui partes sunt essentielles.

Membrum est pars integri.

Sic Grammatica in Etymologiam & Syntaxin; Rhetorica in Elocutionem & Actionem Dialectica in Inventionem & Iudicium dividitur. Ab his enim partibus artes illæ constituuntur.

Hæc distributio principalis est, quum rei longioris explicatio suscipitur. I. Georg:

*Quid faciat lætas segetes quo fidere terram
Vertere, Mæcnas, ulmisque adungere vites
Conveniat: quæ cura bouum, quis cultus habedo*

Sic

Sit pecori, atq; apibus quanta experientia parca
Hinc canere incipiam. —

Cic. Pro Mur. Intellego (judices) tres totius accusationis partes fuisse: & earum unam in reprehensione vitæ, alteram in contentione dignitatis, tertiam in criminibus ambitus esse versatam.

Quin etiam aliter tractatur hoc argumenti genus, vel a partibus ad totum vel a toto ad partes.

Catull.

Quintia formosa est multis; mihi cándida; longa

Recta est: hæc ego sic singula confiteor:

Totum illud, formosa, nego. Nam nulla uenustas

Nulla in tam magno est corpore mica salis.

Lesbia formosa est: quæ cum pulcherrima tota est

Tum omnibus una omnes surripuit Veneres.

C A P. XXVII.

De distributione ex effectis, ubi
de genere & specie.

Distributio ex effectis est, quando partes sunt effecta:

Ut in navi nautæ alii malos scandunt, alii per toros curstant, alii sentinam exhauriunt gubernator autem clavum tenet in puppi.

Distributio generis in species hic excellit

Genus est totum partibus essentielle.

Species est pars generis.

Sic animal genus hominis & bestię dicimus. Animal enim est totum, cuius essentia, nempe,

DIALECT: LIB: I: 39

nempe corporea, animata, sentiens, ad bestiam & hominem communiter attinet. Sic dicimus hominem & bestiam species animalis: quia partes sunt animali subiectæ, quæ animalis essentiam communem habent.

Sic dicimus hominem, genus hominum singulorum; & leonem singulorum leonum: contra vero singulos homines, species hominis: singulos leones, leonis.

Genus est generalissimū aut subalternū.

Species subalterna aut specialissima.

Genus generalissimum, cuius nullum est genus.

Ut in Logica inventionē, argumentum est genus generalissimum artificialium & inartificialium.

Subalternum genus, ut subalterna item species, quod species huius, illius autem genus est.

Ut causa, species est argumenti absolute consentanei, genus materiæ & formæ.

Species specialissima, quæ est individua in species alias.

Ut materia & forma singulares;

Genus vero & species nota sunt causarum & effectorum.

Ut in animali est essentia corporea, quæ materia est ad species communiter attinens: tum facultas vitæ & sensus, quæ forma item

communiter ad species spectat. Quare genus
continet causas, quæ communiter ad ipsius
species attinent: contra itaque etiam species effectus
generis sui continent.

*Hinc universale est insigne ac præstabile,
quæ causam declarat.*

*Distributio generis in species valde quæ
deæcellit, sed difficilis est & rara in uita.*

Attamen illustrationis & exempli gratia
afferemus quod poterimus. Ovid. 1. Metam.
dividit animal in quinque species, stellas, aves,
bestias, pisces, homines: stellis animam tri-
buit, ut etiam philosophi tribuere:

Neu regio foret ulla suis animalibus orba,
Astra tenent cœleste solum formæque Deorum.
Cesserunt nitidis habitandæ piscibus undæ:
Terra feras cepit, volucres agitabilis ær.
Sanctius his animal mentisque capacius altæ
Deerat adhuc, & quod dominari in cætera posset:
Natus homo est.

Sic Cic. 1. offic. Virtutem dividit in speci-
es quatuor, prudentiam, iustitiam, fortitudi-
nem, temperantiam. Sed omne quod honestum
est, Id quatuor partium oritur ex aliqua: aut
enim in perspicientia veri solertiaque versa-
tur, aut in societate hominum tuenda, tribu-
endoque suum unicuique, & rerum contracta-
rum fide; aut in animi excelsi atque invicti
magnitudine ac robore; aut in omnibus quæ
fiunt, quæque dicuntur, ordine & modo, in
quo inest, modestia & temperantia.

Distributio generis in formas specierum

DIALECT. LIB. I. 41

eadem est: quia formæ cum genere constitunt suas species.

Ut animalium aliud loquens, aliud mutum. Genus & species non solum tractantur hac simplici divisionis formula, sed etiam separatim alterum ex altero.

Pro Archia: Ac ne quis a nobis hoc ita dici forte miretur, quod alia quædam in hoc facultas sit ingenii, atque hæc dicendi ratio aut disciplina: nec nos quidem huic cuncti studio penitus unquam dediti fuimus. Etenim omnes artes, quæ ad humanitatem pertinent, habent quoddam commune vinculum, & quasi cognatione quadam inter se continentur. Ars est genus: poetica & eloquentia sunt species.

Contra genus tractatur per species:

Ut 4. Trist.

Materiamque tuis tristem virtutibus imple:

Ardue per præceptis gloria vadit iter.

Hæc tora quis nosset, felix si Troja fuisset:

Publica virtutis per mala facta via est:

Ars tua Tiphys jacet, si non sit in æquore fluctus;

Si valeant homines, ars tua, Phœbe, iacet,

Quæ latet, inque bonis cessat non cognita rebus.

Apparet virtus arguiturque malis.

Exempla igitur specialia suo generi accommodata sunt huius loci.

Ad Atticum: urbem tu relinquas? Ergo idem si Galli venirent? non est (inquit) in parietibus

parietibus respub: at in aris & focis: fecit idem Themistocles: fluctum enim totius barbariae ferre urbs una non poterat. At idem Pericles non fecit, annum fere post quinquagesimum, quum prae ter moenia nil teneret: nostri olim urbe reliqua capta, arcem tamen retinuerunt.

CAP. XXVIII.

De distributione è subiectis.

Reliqua distributio est quodam modo consentaneorum, ut subiectorum & adiunctorum.

Distributio è subiectis est, quum partes sunt subiecta.

Ut apud Catullum.

Virginitas non tota tua est: ex parte parentum est
Tertia pars matri data, pars data tertia patri;
Tertia sola tua est: noli pugnare duobus,
Qui genero sua iura simul cum dote dederunt.

Sic Cic. 5. Tuscul. Sint enim tria genera bonorum, ut iam è laqueis Stoicorum, quibus usum me plurib. quam soleo, intelligo, recedamus. Sint sane illa genera bonorum, dum corporis & externa iaceant humi, & tantummodo, quia sumenda sunt, appellentur bona. Alia autem divina illa, longe laeque se pandant, coelumque contingant, ut ea qui adeptas sit, cur eum beatum modo & non beatissimum dixerim?

CAP. XXIX.

De distributione ex adiunctis.

Di-

DIALECT. LIB. I. 43

Distributio ex adiunctis est, quando partes sunt adiunctæ:

Ut hominum alii sani, alii ægri, alii divites, alii pauperes.

Sic Virgil. 1. Georg. Mundum dividit in quinque partes, mediam torridam, duas extremas frigidas, & reliquas duas temperatas:

Quinq; tenent cælum zonæ, quarum una corusco
Semper sole rubens, & torrida semper ab igni:
Quam circum extremæ dextra lævaq; trahuntur
Cærulea glacie concretæ, atque imbribus atris:
Has inter mediamque duæ mortalibus ægris
Munere concessæ divum.

Cæsar 1. Belli. Gal. Gallia est omnis divisa in partes tres: quarum unam incolunt Belgæ, aliam Aquitani, tertiam, qui ipsorum lingua, Celtæ, nostra Galli appellantur.

CAP. XXX. De definitione.

Definitio est, quum explicatur quid res sit.

Eaque vicissim definitio argui potest.

Definitio est perfecta, aut imperfecta: illa propriè definitio hæc descriptio dicitur

Definitio perfecta est definitio constans è solis causis essentiam constituentibus: quales causa genere & forma comprehenduntur.

Atque hoc modo definitur homo, animal rationale: nempe genere animal intelligimus (ut dictum est) essentiam corpoream plenam

vitæ & sensus, quæ materies hominis est, pars formæ: cum qua si addas *rationale*, totam formam hominis comprehendes, vitæ, sensus, rationis facultate.

Itaque perfecta definitio nihil aliud est quam universale symbolum causarum essentiam rei & naturam constituentis.

Tales definitiones sunt artium: Grammatica est ars bene loquendi: Rhetorica bene dicendi: Dialectica bene differendi: Arithmetica bene numerandi: Geometria bene metiendi.

CAP. XXXI. De descriptione.

Descriptio est definitio ex aliis etiam argumentis rem definiens.

Ut, homo est animal mortale, capax disciplinæ. Hic cum aliqua causa miscetur communis itemque propria circumstantia.

Atque hac succincta breuitas non est in hac specie perpetua: sed saepe illustriorum & magnificentiarum explicacionem desiderat.

Sic gloria describitur in Miloniana: Sed tamen ex omnibus præmiis virtutis, si esset habenda ratio præmiorum, amplissimum esse præmium gloriam: hanc unam, quæ breuitatem vitæ posteritatis memoria consolaretur, quæ efficeret, ut absentes adessemus, mortui viveremus: hanc denique esse, cuius gradibus

etiam

DIALECT: LIB. I: 45

etiam homines in coelum videantur ascendere.

Sic AEneid. 4. Fama describitur.

*Extemplo Libya magnis it fama per urbes,
Fama malum, quo non aliud velocius ullum,
Mobilitate viget, viresque acquirit eundo:
Parva metu primo, mox sese attollit in auras,
Ingrediturque solo, & caput inter nubila condit
Illam terra parens ira irritata Deorum
Extrema, ut perhibent, Cæo Enceladoq: sororem
Progenit, pedibus celerem, & pernicious alis:
Monstrum, horrendum, ingens, cui quot sunt corpore
Tot vigiles oculi subter (mirabile dictu) [pluma
Tot lingue, totidè ora sonant, tot subrigit aures
Nocte volat cæli medio terræque per umbram
Stridens, nec dulci declinat lumina somno:
Luce sedet custos, aut summi culmine recti,
Turribus aut altis, & magnas territat urbes:
Tam ficti prævique tenax, quam nuntia veri.*

Tales sunt descriptiones plantarum, animalium in physicis: item fluminum, montium, urbium in geographis & historicis.

CAP. XXXII. De testimonio divino.

Exposito artificiali argumento, sequitur inartificiale.

Argumentum inartificiale est, quod non sua natura, sed assumpta artificialis alicuius argumenti vi arguit.

Itaque quum exquisita rerum veritas subtilius exquiritur, per exiguam vim probationis habet.

In

*In civilibus autem & humanis rebus
plerumque hoc argumentum præcipuum
fidem e moribus arguentis efficit. si pru-
dentia, virtus & benevolentia adfuerint.*

Id uno nomine testimonium dicitur.

Estque divinum vel humanum.

*In divinis testimoniis numerantur
non solum Deorum oracula, sed etiam
responsa vatum & fatidicorum.*

Quæ omnia Catilin. 3. adhibentur. Nam
ut illa omitam (ait orator) visas nocturno
tempore ab occidente faces, ardoremque coe-
li, ut fulminum iactus, ut terræ motus, cæteræ
que quæ ita multa, nobis consulibus, facta
sunt, ut hæc, quæ nunc fiunt, canere dii im-
mortales viderentur.

Deinde paulo post; Quo quidem tempore,
quum aruspices ex tota Hetruria convenisset
cædes atque incendia & legum interitum, &
bellum civile ac domesticum, & totius urbis
ac imperii occasum appropinquare dixerunt,
nisi dii immortales omni ratione placati, suo
numine prope fata illa flexissent.

Tandem quum dixisset, ut ex aruspicum re-
sponsis ludi facti, & Iovis signum maius factum
conversumque ad orientem, tum ait; Illud ve-
ro, nonne ita præsens est, ut nutu Iovis optimi
maximi factum esse videatur? ut quum hodi-
erno mane per forum meo iussu & coniurati

DIALECT: LIB: I: 47

& eorum indices in ædem Concordiæ duce-
rentur, eo ipso tempore signum statueretur;
quo collocato atque ad vos senatumque con-
verso, omnia & senatus & vos, quæ erant con-
tra salutem omnium cogitata, illustrata &
patefacta vidistis.

Brevius est illud Tibulli:

Quod si vera canunt sacris oracula templis,

Hæc illi nostro nomine dicta refer:

Hoc tibi conjugium promittit Delius ipse

Felix, ac alium desine velle virum.

CAP. XXXIII.

De testimonio humano.

*Testimonium humanum est commune
aut proprium.*

Commune, ut lex & illustris sententia.

Legis autem & non scriptæ & scriptæ

Testimonium est pro Milone. Est enim
(Iudices) non scripta, sed nata lex: quam non
didicimus, accepimus, legimus: verum ex na-
tura ipsa arripuimus, hausimus, expressimus,
ad quam non docti, sed facti; non instituti, sed
imbuti sumus: ut, si vita nostra in aliquas
insidias, si in vim, in tela aut latronum aut
inimicorum incidisset, omnis honesta ra-
tio esset expediendæ salutis. Et ibidem: quod
si duodecim tabulæ nocturnum furem quo-
quo modo, diurnum autem, si se telo defen-
derit, interfici impune voluerunt, quis est, qui
quoquo modo quis interfectus sit, puniendum
putet

Putet, cum videat aliquando gladium
ad occidendum hominem, ab ipsis porrigi-
gibus?

Sententia illustris sunt proverbium

Ut: pares cum paribus facillime con-
gantur, Spartam nactus es, hanc exorna-

Sunt item dicta sapientum:

Nosce teipsum. Ne quid nimis. Spem
præsto est detrimentum.

Proprium testimonium est:

Ut Platonis illud, I. ad Quintum fratrem
Atque ille quidem princeps ingenii & do-
ctrinæ Plato, tum denique fore beatas res pu-
licas putavit, si aut docti & sapientes ho-
mines eas regere cœpissent, aut, qui regere
omne suum studium in doctrina ac sapientia
collocassent. Talia sunt in poetis Aeneid.
Discite justitiam, moniti: & ne temnite divi-

Sic Homérico illo versu:

Ἄϊας δ' ἐκ Σαλαμῖνος ἄρ' ἔξωκαίδεκα νῆας.

Ajax autem ex Salamine duxit duodecim naves
Megarenses victi sunt ab Atheniensibus.

*Vivorum testimonia sunt, non tantum,
quum queritur de fundo aut ceteris
& eiusmodi negotio aliquo, sed etiam
obligationis, confessionis, iniuriarum
testimonia sunt.*

Obligationis

Exemplum est Philipp. 5. Audebo etiam
obligari

DIALECT. LIB. I. 49

obligare fidem meam (P. C.) vobis populo-
que Romano: quod profecto, quum me nulla
vis cogeret, facere non auderem, pertimesce-
remque in re maxime periculosa opinionem
remeritatis. Promitto, recipio, spondeo, (P. C.)
Cæsarem talem semper fore civem, qualis ho-
die sit, qualemque cum maxime velle & o-
ptare debemus.

Pignus autem obligatio quedam est:

Ut apud Virgil. Ecl. 3.

Vis ergo inter nos quid possit, uterque vicissim
Experiamur? ego hanc vitulam (ne forte recuses
Bis venit ad mulctram, binos alit ubere foetus)
Dépono: tu dic, mecum quo pignore certes.

*Confessio est libera: vel expressa tor-
mentis, quæ proprie questio dicitur.*

Tale fuit argumentum contra Milonem,
quod a Cicerone deridetur. Age vero, quæ
erat aut qualis questio? Heus, ubi Ruscio? ubi
Casca? Clodius insidias fecit Miloni? Fecit.
Certa crux. Nullas fecit. Sperata libertas.

*Huc etiam referri potest argumentum
quo utimur, quum affirmationis nostræ
approbatione & experientia proponimus*

Verr. 4. Ecquis Volcatio, si sua sponte ve-
nisset, unam libellam dedisset? Veniat nunc,
experiat: recto recipiet nemo.

Terent. Eunuch.

— Hac periculum in literis,
Fac in palæstra, in musicis, quæ liberum
Scirez quum est adolescentem, solertem dabo.

3. Trist.


Quod magis ut liqueat, neve hoc ego fingere
Ipse velim poenas experiare meas.

Insiurandum etiam testimonium est.

Quale est Æneid. 6.

Per superos, & si qua fides tellure sub ima est,
Invitus, regina, tuo de littore cessi.

*Reciprocatio hic obscurior est, ut qui
testatū verum sit, testis sit etiam vera pr*



P E T R I R A M I D I A

L E C T I C Æ L I B E R

secundus de iudicio

CAP. I: Quid iudicium?

A Dhuc prima dialecticæ artis pars fuit
in inventione: pars altera sequitur in
iudicio.

*Iudicium est secunda pars Logica, &
disponendis argumentis, ad bene iudi
candum.*

*Certa enim dispositionis regula unum
quodque indicatur.*

Unde hæc pars Logica, & iudicium & illa
positio pro eodem dicitur.

CAP. II.

De axiomatica affirmatione ac ne
gatione.

Iudicium

DIALECT: LIB: II. 51

*Indicium est axiomaticum vel dianoë-
ticum.*

*Axioma est dispositio argumenti cum
argumento, qua esse aliquid aut non esse
indicatur.*

*Latine enunciatum, enunciatio, pronunciatum
pronunciatio, effatum dicitur.*

Axioma est affirmatum aut negatum.

*Affirmatum, quando vinculum eius
affirmatur.*

Negatum, quando negatur.

*Hinc nascitur axiomaticum contradi-
ctio, quando idem axioma affirmatur &
negatur.*

CAP. III. De vero & falso.

Axioma deinde est verum aut falsum,

Verum, quando pronunciat, ut res est,

Falsum, contra.

*Axioma verum est contingens aut ne-
cessarium.*

*Contingens, quando sic verum est, ut
aliquando falsum esse possit.*

*Ut, Audentes fortuna juvat. Fac enim id
esse hodie verum, cras falsum esse poterit.*

*Itaque veritatis huius contingentis
indicium, opinio dicitur;*

Quæ præteritorum & præsentium hominum
certa esse potest, futurorum per naturam non
admodum potest, quamvis Deo tempora
omnia præsentia sint. Itaq; Martialis Priscus
merito cavillatur,

Sæpe rogare soles, qualis sim, Prisce, futurus,
Si fiam locuples, sique repente potens.

Quemquam posse putas mores narrare futuros?
Dic mihi, si fias tu leo, qualis eris,

*Necessarium, quando semper verum
est, nec falsum potest esse.*

*Et illud affirmatum appellatur κατὰ
παρτος, de omni.*

*Impossibile contra, quod de nullo unquam
verum esse potest.*

*Axiomata artium sic κατὰ παρτος esse
debent, sed præterea homogenea & κα-
θολικά.*

*Axioma homogeneum est, quando
partes sunt essentielles inter se:*

*Ut forma formato, subiectum proprio ad-
iuncto, genus speciei.*

Id appellatur καθ' αὐτό, per se.

*Axioma catholicum est, quando con-
sequens semper verum est de anteceden-
te, non solum omni & per se, sed etiam
reciprocè:*

Ut, Homo est animal rationale. Numquid

DIALECT: LIB. II: 53

rus est par vel impar. Lupus est natus ad
uiulandum.

Id appellatur καθολικὸν πρῶτον. *universaliter primum.*

Tres hæ sunt leges documentorum artis
propriorum: prima κατὰ παντός, lex veritatis:
secunda, καθ' αὐτό, lex iustitiæ, tertia, καθολικὸν
πρῶτον, lex sapientiæ dicatur.

Atque eiusmodi axiomatum ita catholico-
rum iudicium verissima & prima scientia est.

CAP. IV. De axioma simplici.

Atque hæc de communibus axiomatis af-
fectionibus, species sequuntur.

Axioma est simplex aut compositum.

*Simplex est, quod verbi vinculo con-
tinetur.*

*Itaque affirmato vel negato verbo, af-
firmatur vel negatur:*

Ut, Ignis urit, ignis est calidus: ignis non
est aqua. Hic ignis, est antecedens, urit, con-
sequens.

Atque hic prima est inventarum rerum dis-
positio, causæ cum effectu, ut in primo exem-
plo: subiecti cum adiuncto, ut in secundo: dis-
sentanciæ cum dissentaneo, ut in tertio.

*Quando argumentū quodlibet erunt in
ri potest (exceptis plenis comparationibus
& distributionibus) consentanea quidē*

affirmando, dissentanea negando.

Axioma simplex est generale aut speciale.

Generale, quando commune consequens attribuitur generaliter communi antecedenti.

Atque hic contradictio non semper dividit verum & falsum: sed contingentium utraque pars falsa potest esse: ut

*Omnis in urbe locus Bais prælucet amœnis,
Nullus in urbe locus Bais prælucet amœnis.*

Item non contingentium:

Ut, omne animal est rationale: Nullum animal est rationale.

Axioma speciale est quando consequens non omni antecedenti attribuitur

Et hic contradictio semper dividit verum à falso.

Speciale est particulare aut proprium.

Particulare, quando consequens commune antecedenti particulariter attribuitur.

Hic autem axiomati generaliter consuetudine dicitur.

Aliquid ignoscendum est:

Nihil ignoscendum est.

Aliqua clementia non est laudanda:

Omnis

DIALECT. LIB. II. 55

Omnis clementia est laudanda.

Axioma proprium est, quando consequens antecedenti proprio attribuitur.

Fabulla est bella: cuius negatio & contradictio est, Fabulla non est bella.

C A P. V. De axiome copulato.

Axioma compositum est, quod vinculo coniunctionis continetur.

Itaque e coniunctione affirmata vel negata, affirmatur, vel negatur.

Contradictionisque pars vera est, pars falsa.

Enunciatum compositum est pro sua coniunctione Congregativum aut Segregativum.

Congregativum enunciat omnia consentanea affirmando, omnia etiam dissentanea negando:

Est vero copulatum aut connexum.

Copulatum, cuius coniunctio est copulativa:

Ut I. Æneid.

Vna Eurufq; Notufq; ruunt, creberque procellis Africus, —

*Hic igitur negatio erit & contradictio;
Non una Eurufq; Notufq; ruunt creberq; procellis Africus, —*

*Verum enunciati copulati iudicium
pendet ex omnium partium veritate, falsum
saltem ex una parte falsa.*

*Huic generi affine est enunciati relati-
qualitatis, cuius coniunctio est ipsa relatio*

Eclog. 3.

Tale tuum carmen nobis, divine poeta,

Quale sopor fessis in gramine. —

Hic copulatum iudicium est tanquam dice-
retur: Sopor est fessis gratus, & sic tuum car-
men nobis gratum est: cuius negatio,

Non tale tuum carmen nobis, divine Poeta,

Quale sopor fessis in gramine.

C A P. VI.

De axiomate connexo.

*Axioma connexum est congregati-
vum, cuius coniunctio est connexiva, si*

Ut 2. Æncid.

— Si mihi erum fortuna Sinonem!

Finxit, vanum etiam mendacemq; improba finget

Cuius negatio est,

Non, si miserum fortuna Sinonem

Finxit, vanum etiam mendacemq; improba finget

Coniunctio etiam hæc interdum negatur
apertius, negando consequentiam: ut pro
Amer. Non continuo, si me in sicario: um gre-
gem contuli, sicarius sum. De Fato. Nec si
omne enunciatum verum est aut falsum, sequi-
tur illico causas esse immutabiles.

*Affirmatio enim significat, si sit antea
cedens*

DALECT. LIB. II. 57

cedens, etiam consequens esse. Negatio
itaque & contradictio statuit si sit an-
tecedens, non ideo consequens esse.

Quare, quum indicabis connexum ab-
solute verum esse, necessarium quoque in-
dicabis, & intelliges hanc necessitatem e-
necessariarum partium connexionem oriri, qua
ipsa potest esse vel in falsis partibus;

Ut, Si homo est leo, est etiam quadrupes,
necessarium connexum est.

At, si connexio sit contingens & pro
sua tantum probabilitate ponatur, indi-
cium eius tantum opinio fuerit.

Ut Terent. And.

Pamphile, si id facis, hodie postremum me vides.

Connexo axiomati affinis est ista con-
sequentia relatio:

Ut, quum Tullius sit orator, est etiam pe-
ritus bene dicendi.

CAP. VII.

De axioma discreto.

Axioma segregativum est, cuius con-
iunctio est segregativa.

Ideoque argumenta dissentanea enunciat.

Enuntiativum segregativum est dis-
cretum aut disiunctum.

Discretum, cuius coniunctio est discre-
tiva

C 5

Itaque;

Itaque è dissentaneis præcipue diversa enuntiat.

Tul. 5. Quanquam sensu corporis iudicentur, ad animum referri tamen. Cuius negatio & contradictio est Non quanquam corporis sensu iudicentur, tamen ad animum referri: vel, Quamquam sensu corporis iudicentur, non tamen ad animum referri: Nam, tamen, est hic coniunctio præcipua.

Discretum enuntiatum indicatur esse verum & legitimum, si partes non solum vera sed etiam discreta sint: falsum vel ridiculum contra.

C A P. V I I I.

De axiomate disiuncto.

Axioma disiunctum est axioma segregativum, cuius coniunctio est disiunctiva.

Ut, I. Georg.

Illic, ut perhibent, aut intempesta silet nox
Semper, & obtenta densantur nocte tenebræ,
Aut redit à nobis aurora, diemque reducit.

De Fat. Omnis enunciatio est vera aut falsa.

Hic significatur, è disiunctis unicum verum esse.

Negatio igitur erit & contradictio: Non omnis enunciatio est vera aut falsa.

Et contradictione significatur non necessario alterutrum verum esse,

Nam

DIALECT. LIB. II. 59

Nam, si disiunctio absolute vera est, est etiam necessaria: partesque disiunctae sunt oppositae sine ullo medio.

Verumtamen, quamvis absolute vera disiunctio, necessaria quoque sit, tamen nihil necesse est partes separatim necessarias esse:

Ut homo est bonus, vel non est bonus: disiunctio necessaria est; & tamen, homo est bonus, non est enuntiatio necessaria. Item: homo non est bonus, non est enuntiatio necessaria.

Sed disiunctionis necessitas pendet è necessaria partiū oppositione & disiunctione, non ex earum necessaria veritate.

Disiunctio autem plerumque est ex conditione:

Ut, si quærat, utrum Cleon venerit, an Socrates, quia ita pactum sit alterutrum tantum venturum esse.

Itaque, si disiunctio sit contingens, non est absolute vera, & tantum opinabilis est.

Qualis est frequenter in hominum usu.

Ovid. in Epistola Leandri,

Aut mihi continget felix audacia salvo,

Aut mors solliciti finis amoris erit.

C A P. IX.

De syllogismo & eius partibus.

Atque

Atque eiusmodi iudicium est axiomaricum axiomatis per se manifesti; sequitur dianoeticum.

Dianœa est, quum aliud axioma ex alio deducitur.

Estque syllogismus aut methodus.

Syllogismus est dianœa, qua quæstio cum argumento ita disponitur, ut posito antecedente, necessario concludatur.

Nam, quum axioma dubium sit quæstio efficitur, & ad eius fidem tertio argumento opus est cum quæstione collocata.

Syllogismi antecedens partes duas habet, propositionem & assumptionem.

Propositio est prima pars antecedentis qua quæstionis saltem consequens cum argumento disponitur.

Assumptio est secunda pars antecedentis, qua assumitur à propositione.

Syllogismi autem pars consequens est, qua completitur partes quæstionis, eamque concludit:

Unde complexio & conclusio dicitur.

Si qua pars syllogismi defuerit, enthymema dicitur.

Si quid præter illas tres partes accesserit, prosyllogismus.

Partis

DIALECT. LIB. II. 61

Partium etiam ordo saepe confunditur.

Attamen, si quæ dubitatio propterea fuerit explenda, quæ desunt: amputanda quæ supersunt, & pars qualibet in locum redigenda est.

C A P. X.

De syllogismo simplici contracto.

Syllogismus est simplex aut compositus.

Simplex, ubi pars consequens questionis disponitur in propositione: pars antecedens in assumptione.

Estque affirmatus è partibus omnibus affirmatis.

Negatus è negata antecedentium partium altera cum complexione.

Generalis è propositione & assumptione generalibus,

Specialis ex altera tantum generali.

Proprius ex utraque propria.

Simplex syllogismus est contractus partibus vel explicatus.

Contractus, quando exemplum pro argumento ita subiicitur particulari questionis, ut utramque partem antecedens & assumptione affirmatum intelligatur.

Quæ-

Quædam confidentia est virtus, ut
constantia.

Quædam confidentia non est virtus, ut
audacia.

Hic enim argumentum quæstionis utramque
partem antecedere intelligitur, tanquam esset
expressum, Constantiam esse virtutem & con-
fidentiam: ideoque quandam confidentiam
esse virtutem: item audaciam non esse vir-
tutem, & tamen esse confidentiam, ideoque
quandam confidentiam non esse virtutem.

Sic usus differendi, magister syllogistici ju-
dicii, contrahitur, nec aliter explicatur.

Atque ista expositio principium syllogismi
partibus explicati ab Aristotele efficitur, tan-
quam per se pleno syllogismi iudicio sit cla-
rior & illustrior.

C A P. XI.

De prima specie syllogismi simplicis explicati.

*In syllogismo explicato propositio est
generalis aut propria: & conclusio simi-
lis antecedenti, aut parti debiliori.*

Species duæ sunt.

*Prima, ubi argumentum semper sequi-
tur, negatum in altera parte.*

Generalis, I.

Turbatus non bene utitur ratione:

Sapiens bene utitur ratione:

Sapiens

DIALECT: LIB: II: 63

Sapiens igitur non est turbatus.

Hoc iudicium ita fit à Cic. 3. Tusc. Et, quem-
admodum (ait) oculus conturbatus non est
probe affectus ad suum munus fungendum: &
reliquæ partes totumq; corpus a statu quum
est motum, deest officio suo ac muneri: sic con-
turbatus animus non est probe affectus ad ex-
sequendum munus suum. Munus autem ani-
mi est ratione uti: & sapientis animus ita sem-
per affectus est, ut ratione optime utatur:
nunquam igitur est perturbatus.

Generalis I I.

Res mortalis est composita:

Animus non est compositus:

Animus igitur non est mortalis.

Cic. I. Tusc. hoc syllogismo iudicat ani-
mum immortalem esse. In animi autem co-
gnitione (inquit) dubitare non possumus,
nisi forte in physicis plumbei sumus, quin nihil
sit animis admixtum, nihil concretum, nihil
copulatum, nihil coagmentatum, nihil duplex
Quod quum ita sit, certe nec secerni, nec di-
vidi, nec discerpi nec distrahi potest: nec in-
terire igitur. Est enim interitus, quasi disces-
sus & secretio ac diremtus earum partium,
quæ ante interitum iunctione aliqua tene-
bantur.

Specialis I.

Lividus non est magnanimus:

Maximus est magnanimus:

Maximus igitur non est lividus.

Hoc

Hoc iudicio Ovid. 3. De Pont. El. g. 3.
concludit:

Livor, incers vitium, more non exit in altos:
Utque latens ima vipera serpit humo.
Mens tua sublimis supra genus eminet ipsum,
Grandius ingenio nec tibi nomen inest,
Ergo alii noceant miseris, optentque tæmeri;
Tinctaque mordaci spicula felle gerant:
At tua supplicibus domus est assueta iuvandis,
In quorum numero me precor esse velis.

Specialis. I I.

Saltator est luxuriosus:

Murana non est luxuriosus:

Muræna igitur non est saltator.

Cic. pro Mur. Nemo enim scire saltat sobrius, nisi forte insanit: neque in solitudine, neque in convivio moderato atque honesto. Intempestivi convivii, amœni loci, multarum deliciarum comes est extrema saltatio. Tu sihi arripis id, quod necesse est omnium viti-
orum esse postremum: relinquis illa, quibus remotis hoc vitium omnino esse non potest: nullum turpe convivium, non amor, non comessatio, non libido, non suntus ostenditur: & quum ea non reperiantur, quæ voluptatis nomen habent, quæque vitiosa sunt, in quo ipsam luxuriam reperire non potes, in eo te umbram luxuriæ reperturum putas? Hoc iudicii modo Ovidius 1. Trist. Eleg. 1. triplici-
ter concludit, dum carminum suorum excu-
sationem exponit.

Carmina proveniunt animo deducta sereno:

Nubila sunt subitis tempora nostra malis.

Carmi-

DIALECT. LIB. II. 65

Carmina secessum scribentis & oia quærunt:
Me mare, me venti, me fera jaclat hyems.
Carminibus metus omnis abest: ego perditus en-
Hæsarum jugulo jam puto iamque meo. (Sem
Hæc quoque quæ facio, iudex mirabitur æquus:
Scriptaque cum venia qualiacunque leget.

Proprius. I.

*Agésilæus non est pictus ab Apelle.
Alexander est pictus ab Apelle:
Alexander igitur non est Agésilæus.*

Proprius II.

*Cæsar oppressit patriam:
Tullius non oppressit patriam;
Tullius igitur non est Cæsar.*

C A P. XII.

De secunda speciei syllogismi simplicis explicati.

*Secunda species explicati syllogismi est
quando argumentū antecedit in propo-
sitione sequitur affirmatum in assertione.*

Affirmatus generalis:

*Omne iustum est utile:
Omne honestum est iustum:
Omne igitur honestum est utile.*

Quod Cicer. 2. Offic. ita concludit: Sum-
ma quidem auctoritate philosophi, severe sa-
ne atque honeste hæc tria genera confusa co-
gitatione distinguunt. Quidquidem iustum
sit, id etiam utile esse censent. Itemque, quod
honestum, idem iustum. Ex quo efficitur, ut
quid-

quidquid honestum sit, idem sit utile.

Negatus generalis.

Timidus non est liber:

Avarus est timidus:

Avarus itaque non est liber.

Hoc ita concluditur & iudicatur ab Horatio I. Epist.

Quo melior seruo, quo liberior sit avarus,
In trivis fixum quum se demittit ob assem,
Non video. Nam qui cupiet, metuet quoque porro:
Qui metuens vivit, liber mihi non erit unquam.
Sic Terent. in Eunuch. concludit: & iudicat

Consilii expers, consilio regi non potest:

i. *Amor est consilii expers:*

Cor silio itaque regi non potest.

Syllogismus his verbis sequitur:

Here, quæ res in se neque consilium neque modum
Habet ullum, eam consilio regere non potes.
In amore omnia hæc insunt vitia: iniuriæ,
Suspiciones, inimiciæ, induciæ,
Bellum, pax rursum. Incerta hæc si tu perstiteris
Ratione certa facere, nihilo plus agas,
Quam si des operam, ut cum ratione insanias.

Affirmatus specialis.

Consules virtute facti, studiose rempub.
tueri debent:

Cicero est virtute factus Consul:

Cicero igitur rempub. studiose tueri debet.

Sic orator diligentiam suam Agra. 2. concludit & iudicat: Nam cum omnium consulum, ait, gravis in republica custodienda, cura

DIALECT. LIB. II. 67.

ac diligentia debet esse, tum eorum maximè,
qui non in incunabulis sed in campo sunt con-
sules facti. Nulli populo Romano pro me ma-
iores nostri sponderunt: mihi creditum est
à me petere, quod debeo, me ipsum appellare
debetis. Quemadmodum quum petebam, nul-
li me auctores generis mei vobis commenda-
runt: sic, si quid deliquero, nulla sunt imagi-
nes, quæ me à vobis deprecantur. Quare mo-
do ut vita suppetat (quanquam ego sum is, qui
eam possum ab istorum scelere insidiisque de-
fendere) polliceor hoc vobis, Quirites bona
fide, rempub. vigilantì homini, non timido,
diligenti, non ignavo commissis.

Quod optatum redierit, gratum est:

Lesbia Catullo optata rediit:

Grata igitur est.

Catullus sic concludit.

Si quicquam cupidoq; optantiq; obtrigit unquam

Si peranti, hoc est gratum animo proprie.

Quare hoc est gratum, nobis quoq; charius auro,

Quod te restituis, Lesbia, mi cupido.

Restituis cupido atque insperanti ipsa refers te

Nobis, O lucem candidiore nota?

Quis me uno vivit felicior? aut magis hac quid

Optandum vita dicere quis poterit?

Negatus specialis.

Deceptor amantis puella non est laudandus:

*Demophoon est deceptor amantis puella, ut Phyl-
lidis:*

Demophoon igitur non est laudandus.

Phyllis apud Ovidium ita iudicat Demo-

phoontem

phoontem laudandum non esse:

Fallere credentem non est operosa puellam

Gloria: simplicitas digna favore fuit.

Sum decepta tuis & amans & foemina verbis,

Di faciant laudis summa sit ista tua!

Affirmatus proprius.

Octavius est heres Caesaris:

Ego sum Octavius:

Sum igitur heres Caesaris.

Negatus proprius,

Antonius non est filius Caesaris:

Tu es Antonius:

Non es igitur filius Caesaris.

CAP. XII.

De syllogismo connexo primo.

Adhuc syllogismus simplex fuit.

Syllogismus compositus est syllogismus, ubi tota questio est pars altera propositionis affirmata & composita: argumentum est pars reliqua.

Tollere autem in composito syllogismo, est specialem contradictionem ponere.

Syllogismus compositus est connexus aut disiunctus.

Syllogismus connexus est syllogismus compositus propositionis connexa.

Estque duorum modorum.

Primus modus syllogismi connexi est.

qui

DIALECT: LIB: II. 69

*qui assumit antecedens, & consequens
concludit.*

Quomodo Cicero iudicat & concludit

lib. 2. de divinatione;

Si Dii sunt, divinatio est:

Sunt autem dii:

Divinatio est igitur.

3. Offic. Atque si etiam hoc natura præscribit, ut homo homini, quicumque sit, ob eam ipsam causam, quod is homo sit, consultum velit, necesse est secundum eandem naturam omnium utilitatem esse communem. Quid si ita est, una continemur omnes & eadem lege naturæ. Idque ipsum si ita est, certe violare alterum lege naturæ prohibemur, Verum autem primum: verum igitur & extremum.

Sic Æneid. 4. Dido iudicat Æneæ remanendum esse.

(te

Mene fugis? Per ego has lacrymas dextramq; tuā,
Quando aliud mihi iam mihi eræ nil ipsa reliquit,
Per connubia nostra, per inceptos hymenæos,
& bene quid de te merui, fuit aut tibi quicquam
Dulce meum: miserere domus labentis, & istam,
Oro, si quis adhuc precibus iocus, exue mentem
Te propter Libycæ gentes Nomadumq; tyranni
Odere, intenzi Tyrii: te propter eundem
Extinctus pudor, & qua sola sidera adibam,
Fama prior, Cui me moribundam dederis hospes

*Frequenter hic non assumitur idem,
sed maius:*

Ut 1. Catil. Si te parentes timerent atque
odissent tui, neque illos ulla ratione placare
posses,

posses, ut opinor, ab eorum oculis aliquo concederes. Nunc te patria (quæ com munis est omnium nostrum parens) odit ac metuit, & iam diu nihil de te iudicat, nisi, te de parricidio suo cogitare: huius tu neque auctoritatem verebere? neque iudicium lequere? neque vim pertimesces?

Concludendi modus hic idem est, quando propositio est relata temporis.

Quo genere nymphea Oenone, apud Ovid. concludit errorem stultitiæ suæ.

Quum Paris Oenone poterit spirare relictæ,
Ad fontem Xanthi versa recurret aqua.

Xanthe retro propera, versæq; recurrete lymphæ:
Sustinet Oenonen deseruisse Paris.

C A P. X I V.

De syllogismo connexo secundo.

Secundus modus connexi tollit consequens, ut tollat antecedens.

Si ulli rei sapiens assentietur usquam, aliquando etiam opinabitur:

Nunquam autem opinabitur:

Nulli igitur rei assentietur.

Eodem syllogismo Ovid. 2. Trist. stulticiam suam iudicat.

Si sciperem, doctas odissem iure sorores,
Namina cultori perniciose suo.

At nunc (tanta meo comes est insania morbo!)
Sæpius mem or refero rursus ad ista pedem.

Hæ duæ syllogismi species sunt omnium usitatissimæ.

DIALECT: LIB: II. 71

C A P. X V.

De syllogismo disjuncto primo.

*Syllogismus disiunctus est syllogismus
compositus propositionis disiunctæ.*

Modi duo sunt.

*Primus tollit unum, & reliquum
concludit.*

Ut:

Aut dies est aut nox est:

At dies non est:

Nox igitur est.

Ciceronis pro Cluentio iudicium tale est:
Sed quum esset hæc illi proposita conditio;
ut aut iuste pieque accusaret, aut acerbe in-
digneque moreretur; accusare quoquo modo
posset, quam illo modo mori maluit. Disjun-
ctio clarior sic erit:

Aut accusandum aut moriendum:

Nox moriendum:

Accusandum igitur.

Sic idem; 2. Phil. ratiocinatur; Nunquam-
ne intelliges tibi statuendum esse, utrum illi,
qui istam rem gesserunt, homicidæ sunt, an vin-
dices libertinis? Attende enim paulisper, cogi-
tationemque sobrii hominis ad punctam tem-
poris suscipe: & ego qui sum illorum, ut ipse
fateor, familiaris, ut a te arguor, socius, nego
quicquam esse medium: confiteor illos, nisi
liberatores populi Rom. conservatoresque rei-
publicæ

pública sint, plus quam sicarios, plusquam homicidas, plus quam parricidas esse. Si quidem est atrocius patriæ parentem, quam suum occidere, Tu homo sapiens & consideratus, quid dicis? Si parricidæ, cur honoris causa te sunt & in hoc ordine, & apud populū Romanum semper appellati? cur M. Brutus, te referent legibus est solutus, si ab urbe plus quam decem dies abfuisset? cur ludi Apollinares incredibili M. Bruti honore celebrati? cur provincia Cassio & Bruto data? cur quaestores additi? cur legatorum numerus auctus? Atque hæc acta per te. Non igitur homicidæ. Sequitur liberatores tuo iudicio sint; quando quidem tertium nihil potest esse.

Si partes disiunctæ propositionis sint duabus plures, iudicandi concludendique ars erit eadem.

Sic Cicero iudicat Rabirium cum consiliis esse oportere: Atqui videmus (air) hæc in rerum natura tria fuisse, ut aut cum Saturnino esset, aut cum bonis, aut lateret. Latere autem, mortis erat instar turpissimæ: cum Saturnino esse, furoris & sceleris: virtus & honestas & pudor cum coss. esse cogebat.

C A P. XVI.

De syllogismo disiuncto secundo.
Disiunctus secundus è propositione partibus

DALECT. LIB. II. 73

tibus omnibus affirmata assumit unum

& reliquum tollit: ut,

Dies est, aut nox est:

At dies est:

Nox igitur non est.

Sic Iuno cum Iove de Turno concludit.

10. *Æneid.*

*Quid si, quod voce gravaris,
Mente dares, atq; hæc Turno rata vita maneret?
Nunc manet infonem gravis exitus, aut ego verã
Vana feror: quod ut ò potius formidine falsa
Ludar, & in melius tua, qui potes, orsa reflectas.*

*Eiusmodi syllogismus efficitur è propo-
sitione copulata negata, qua negata com-
plexio dicitur: quaque disiunctionis af-
firmata vim obtinet:*

Non & dies est, & nox est:

At dies est:

Non igitur nox est.

CAP. XVII. De methodo
secundum Aristotelem unica.

*Methodus est dianœa variorum axio-
matum homogeneorum, pro natura sue
claritate prepositorum, unde omnium
inter se convenientia indicatur, memo-
riaque comprehenditur.*

Atque, ut spectatur in axiome veritas &
falsitas, in syllogismo consequentia & incon-
sequentia:

*Sic in methodo consideratur, ut persc-
lararius precedat, obscurius sequatur,
omninoq; ordo & confusio indicatur.*

*Sic disponetur ex homogeneis axiomati-
tis primo loco absoluta notione primum,
secundo secundum, tertio tertium, & ita
deinceps.*

*Ideoque methodus ab universalibus ad
singularia perpetuo progreditur.*

*Hac enim sola & unica via proceditur ab
antecedentibus omnino & absolute notiori-
bus ad consequentia ignota declarandum,
eamque solam methodum Aristoteles docuit.*

**C A P. De prima methodi illu-
stratione per exempla artium.**

*Sed methodi unitatem exempla doctrina-
rum & artium precipue demonstrant
precipueque vendicant.*

*Quibus quamvis omnes regulae gene-
rales sint & universales, tamen earum
gradus distinguuntur: quātoq; unaqueq;
generalior erit, tanto magis precedet.*

*Generalissima loco & ordine prima erit
quia lumine & notitia prima est.*

*Subalterna consequentur, quia clarita-
te sunt proxima; atq; ex his natura notio-
res*

DIALECT. LIB. II. 75

res præponetur, minus nota substituetur.

Tandemq; specialissima substituentur.

Definitio itaque generalissima prima erit.

Distributio sequetur,

Quæ si multiplex fuerit, præcedet in partes integras partitio, sequetur divisio in species.

Partesque ipsæ & species eodem ordine sunt rursus tractandæ ac definiendæ, quod distributæ fuerint.

Et transitionum vinculis, si longior inter eas inter sit explicatio, colligandæ sunt. Id enim auditorem reficit ac recreat.

Atque ut res familiarius accipiatur, exemplo quoq; familiari nobis utendum est. Omnes definitiones, distributiones, regulæ grammaticæ repertæ sint, atque unaquæque sigillatim iudicata: omniaque hæc documenta variis tabellis inscripta, una confundantur & conturbentur in hydria aliqua, ut in ollæ ludo fieri solet: hic si quæras, quæ pars dialecticæ te doceat has regulas ita confusas disponere & in ordinem redigere: primo locis inventionis nihil opus est, quum sint omnia reperta neq; primo axiomatis iudicio, quum unumquodque axioma probatum & æstimatum sit: nec secundo syllogismi iudicio opus, quum

omnes singularum rerum controversiæ his de rebus disceptatæ & conclusæ: sola methodus superest. Dialecticus igitur lumine methodi artificiosæ, seligit in hac urna definitionem grammaticæ (id enim est generalissimum) & primo loco statuet: Grammatica est doctrina bene loquendi. Tum requirer in eadem urna partitionem Grammaticæ, & collocabit secundo loco: Partes Grammaticæ sunt duæ Etymologia & Syntaxis. Deinceps in eodem vase definitionem Etymologiæ de vocibus separabit, & tertio gradu antecedentibus adiunget. Tum vocis partes in literis & syllabis, speciesque in vocibus numeri & sine numero requirer, exituumq; transitiones suis locis collocabit. Atque ita omnium Etymologiæ partium definitiones, distributiones, colligationes, exempla denique specialissima in singulis disponet. Idemque in Syntaxi faciet.

Hanc viam omnes artes sibi proposuerunt.

C A P. XIX.

De secunda methodi illustratione
per exempla poetarum, oratorum, historicorum.

Atqui methodus, non solum in materia artium & doctrinarum adhibetur, sed in omnibus rebus quas facile & perspicuè docere volumus.

Ideoque poeta, oratores omnesque omnino

DIALECT. LIB. I. 77

*myino scriptores, quoties docendum sibi
auditorum proponunt, hanc viam sequi
volunt: quamvis non usquequaque in-
grediantur atque insistant.*

Virgil. in Georg. distribuit propositam ma-
teriam in quatuor partes, ut ante dixi: primo-
que libro res communes persequitur, ut a-
strologiam, meteorologiam, deque segetibus
& earum cultu differit, quæ pars operis pri-
ma erat, tumque transitio adhibetur initio
secundi libri:

Haftenus arborum cultus & sidera cœli:

Nunc te, Bacche, canam.

Deinceps scribit generaliter de arboribus,
tum specialiter de vitibus. Transitio secun-
da adhibetur ad tertiam partem, sed imperfe-
ctior & sine epilogo, tertii libri initio de bo-
bus, equis, ovibus, capris, canibus:

Te quoq; magna Pales, & te memorande cane-
Pastor ab Amphryso. (mus

Tandem initio quarti libri transitio tertia
est de quarta parte, sed item imperfecta, è so-
la propositione de apibus:

Protinus aerii mellis silvestria dona

Exsequar. —

Sic igitur poeta generalissimum primo,
subalterna medio; specialissima extremo loco
ponere studuit.

Sic Ovidius in Fastis dispositionis huius grati-
am sequitur: proposuit initio summam operis-
Tempora cum causis Latium digesta per annum,

Lapsaque sub terras orta que signa canam.
Mox, impioratione facta, partitionem anni
statuit, factam à Romulo primum in decem
menses, quam reprehendit:

Tempora digereret quum conditor urbis, in anno
Constituit menses quinque bis esse suo.

Et paulo post Numæ divisionem plenio-
rem adjungit:

At Numa nec Ianum nec avitas præterit umbras
Mensibus antiquis præposuitque duos.

Denique poeta, communes differentias in-
terpretatus diei fasti, nefasti, comitalis, nun-
dinalis, calendarum, nonarum, iduum, tum
atri, tandem unumquemque menseni suo loco
prosequitur, & præfatione ordinis hujus a ge-
neralibus ad specialia studium indicat.

Hæc mihi dicta semel, totis hærentia fastis,
Ne seriem rerum scindere cogar, erant.

Tandem singulis partibus expositis trans-
itio coniungitur, ut in fine 1. & initio 2.

Sed jam prima mei pars est exacta laboris,
Cumque suo finem mense libellus habet.

Ianus habet finem cum carmine, crescat & an-
Alter ut it mensis, sic liber alter eat. (nus:

In singulis libris postea transitiones adhi-
bentur, sed minus accuratæ.

*Oratores in procæmio, narratione,
confirmatione, peroratione, hunc ordi-
nem affectant, eumque artis & nature
& rei ordinem appellant, & interdum
studiosius affectantur.*

Ut

DIALECT. LIB. II. 79

Ut in accusatione Cicero primum proponendo, tum partiendo; Quæstor (inquit) Cn. Papyrio Cos. fuisti ab hinc annos quatuordecim, & ex illa die ad hanc diem quæ fecisti, in iudicium voco, hora nulla vacua furto, scelere, crudelitate, flagitio reperietur.

Propositio hic & definitio summæ rei est, tanquam in hoc iudicio generalissima. Partitio sequitur:

Hi sunt anni consumti in quæstura & legatione Asiatica, & prætura urbana & prætura Siciliensi: quare hæc eadem erit quadripartita distributio totius accusationis meæ.

Quas partes quatuor earumque partium particulas deinceps suo quamque ordine & loco tractavit, & transitionibus copulavit, tres primas tertio libro.

Quamobrem (ait) quæstura istius demonstrata, primique magistratus & furto & scelere perspecto, reliqua attendite.

Tum vero expositis legationis criminibus, transitio ad præturam sequitur.

Verum ad illam iam veniamus præclaram præturam, criminaque ea, quæ notiora sunt his qui adsunt, quam nobis, qui meditati ad dicendum paratique venimus.

Transitio hæc imperfectior est sine epilogo tandem principio quartæ orationis transitio est consimilis ad quartam partem de prætura Siciliensi: Multa mihi necessario, iudices, præmittenda sunt: ut possim aliquo modo de
iis

P. RAMI

iis rebus, quæ meæ fidei commissæ sunt, dicere.
Recepi enim causam Siciliæ; ea me ad hoc
negotium provincia attraxit.

Sic Livius summam septingentorum anno-
rum initio complectitur, tum per decades
dividit.

C A P. X X.

De crypticis methodi.

*Hæc igitur in variis axiomatis hæ-
nogeneis suoque vel syllogismi indicio
notis methodus erit quoties perspicuè res
decenda erit.*

*At quum delectatione motuve aliquo
maiore, in parte aliqua fallendus erit
auditor, homogenea quadam reiicientur
ut definitionum, partitionum, transitio-
numque lumina.*

*Quadam assumentur heterogenea, velut
digressiones a re & in re commorationes.*

*Sed præcipue rerum ordo initio inver-
tetur, antecedentiaque non nulla conse-
quentibus postponentur.*

Itaque ad illam perfectæ methodi regulam
hæc alicubi imperfectior forma non solum de-
tractis rebus mutila est, vel superadditis re-
dundat, sed ordinis sui quibusdam gradibus in-
versis præpostera est.

Quod

DIALECT: LIB: II. 81

*Quod poeta facit maiore quadam ar-
tificii specie, dum populum ducendum si-
bi proponit, id est, belluam multorum ca-
pitum, ideoque variis modis decipit, in-
cipit a medio, ibique primum saepe com-
prehendit, postremum denique incerto
aliquo & inopinato casu concludit.*

*Sic (ut Hor. ait) Hom. Iliada disposuit.
Nec gemino bellum Trojanum orditur ab ovo.
Semper ad eventum festinat, & in medias res,
Non secus ac notas, auditorem rapit, &, quæ
Desperat tractata nitescere posse, relinquit.
Atque ita mentitur, sic veris falsa remiscet,
Primo ne medium, medio ne discrepet imum?*

*Sic Virg. Æneam a Sicilia excepit, & in con-
vivio Carthaginis præterita narrantem fecit,
postrema variis perturbata casibus induxit.
Sic comici poetæ, tametsi magno iudicio co-
mœdias per actus & scenas distinguunt: effi-
ciunt tamen, ut omnia fortuita videantur.*

*Oratores vero ad victoriam omnia re-
ferunt. Itaque non tam docendi, quam
permovendi gratia firmissimum quodq;
primum ab iis collocatur, dum tamen
ea, quæ æque excellent servantur
etiam ad extremum, & Home-
rica dispositione, mediocria in
mediam turbam atque
in gregem conferantur.*



INDEX CAPITUM

Cap. LIBRI I. Pag.

1.	<i>Vid dialectica,</i>	3.
2.	<i>De partibus dialecticæ, deque argumenti generibus,</i>	3.
3.	<i>De efficiente, procreante & conservante,</i>	4.
4.	<i>De efficiente sola & cum aliis,</i>	5.
5.	<i>De efficiente per se & per accidens,</i>	6.
6.	<i>De materia,</i>	7.
7.	<i>De forma,</i>	9.
8.	<i>De fine,</i>	10.
9.	<i>De effectis,</i>	14.
10.	<i>De subiecto,</i>	12.
11.	<i>De adiuncto,</i>	15.
12.	<i>De diversis,</i>	16.
13.	<i>De disparatis,</i>	17.
14.	<i>De relatis,</i>	18.
15.	<i>De adversis,</i>	19.
16.	<i>De contradicentibus,</i>	20.
17.	<i>De privantibus,</i>	21.
18.	<i>De paribus,</i>	22.
19.	<i>De maioribus,</i>	26.
20.	<i>De minoribus,</i>	27.
21.	<i>De similibus,</i>	29.
22.	<i>De dissimilibus,</i>	32.
23.	<i>De coniugatis,</i>	33.
24.	<i>De notatione,</i>	35.
25.	<i>De distributione,</i>	36.
26.	<i>De distributione ex causis, ubi de integro & membro.</i>	37.
27.	<i>De distributione ex effectis, ubi de genere & specie.</i>	39.

28.	<i>De distributione è subiectis,</i>	42.
29.	<i>De distributione ex adiunctis</i>	42.
30.	<i>De definitione,</i>	43.
31.	<i>De descriptione,</i>	44.
32.	<i>De testimonio divino,</i>	45.
33.	<i>De testimonio humano,</i>	47.

Cap. LIBRI II: Pag.

1.	<i>Quid iudicium,</i>	50.
2.	<i>De axiomatis affirmatione ac negatione,</i>	50.
3.	<i>De vero & falso,</i>	51.
4.	<i>De axioma simplici,</i>	3..
5.	<i>De axioma copulato,</i>	55.
6.	<i>De axioma connexo,</i>	56.
7.	<i>De axioma discreto,</i>	57.
8.	<i>De axioma disiuncto,</i>	58.
9.	<i>De syllogismo & eius partibus,</i>	59.
10.	<i>De syllogismo simplici contracto.</i>	61.
11.	<i>De prima specie syllogismi simplicis explicati,</i>	69.
12.	<i>De secunda specie syllogismi simplicis explicati</i>	65.
13.	<i>De syllogismo connexo primo,</i>	68.
14.	<i>De syllogismo connexo secundo,</i>	78.
15.	<i>De syllogismo disiuncto primo,</i>	70.
16.	<i>De syllogismo disiuncto secundo,</i>	70.
17.	<i>De methodo secundum Aristotele unica,</i>	76.
18.	<i>De prima methodi illustratione per exempla artium,</i>	74.
19.	<i>De secunda methodi illustratione per exempla poetarum, oratorum, historicorum,</i>	76.
20.	<i>De crypticis methodi.</i>	80.

FINIS.

1
S. f. i. Rami M. l. R. f. i. a. f. i. b. i. d. u. o
[Decorative flourish]

St. M. l. R. f. i. a. f. i. b. i. d. u. o